

求恕齋
叢書

雪橋詩話

七

雪橋詩話卷第七

遼陽楊鍾義撰集

吳興劉承幹參校

漁洋司寇跋徐騎省集云五代時中原喪亂文獻放缺
惟南唐文物甲于諸邦而鉉錯兄弟與韓熙載爲之冠
冕常侍詩文都雅有唐代承平之風入宋與湯悅奉詔
撰江南錄至金陵亡國之際不言其君之過但以歷數
爲言諫後主文尤極悱惻讀者悲之跋谷音云谷音二
卷皆宋末人詩上卷王澹以下凡十人率任俠節義之
士下卷詹本以下凡十五人則藏名逃世之流也番陽

布衣瀟湘漁父以下五人不可得其姓字要之皆宋之
逸民也其詩慷慨激烈古澹蕭寥非宋末作者所及是
時謝皋羽林霽山輩皆以文章節義著于東南而又有
此三十人者與之遙爲應和亦奇矣其餘跋尾亦多論
詩之語至題周石初集詞多貶斥彭文勤謂石初生前
至元歿洪武年八十有八身閱有元一代興亡常庚申
君末造吏貪將殘兵驕寇熾生民流離塗炭之苦身丁
患難一發之於篇什視少陵三吏三別酸楚過之有小
雅大東告哀遺意垂爲世鑑是謂真詩阮翁但解流連
光景修飾句法嵌一二稀用字爲工而已此詣烏足以

知之雖詆漁洋稍過其知人論世非斷斷於版本鈔法者所及

彭文勤知聖道齋讀書跋尾精核在陳仲魚吳兔牀之上跋重修政和經史證類備用本草云長孫無忌等修隋書諱忠節曰誠節符堅曰永固劉昫唐書志稱唐爲皇朝胡三省通鑑注以宋郡縣釋地理撰述不以爲嫌朝廷不以爲罪厚之至也證類本草一書乃元時所鑄有麻革信之序署名己酉刻者張存惠字魏卿其自識云泰和甲子下己酉歲日南至晦明軒謹記考金章宗泰和三年甲子越三十年天興四年甲午哀宗自焚於

蔡是時元定宗雖未紀年號而金之爲元至己酉已十有五年矣信之金源名士與元裕之劉京叔齊名但署甲子竊取淵明魏卿爲人宅無所表見而惓惓之意托朔年以懷舊其辭隱而顯非細讀其文焉足以知當日情事哉此文微顯闡幽燭見古賢胸臆錢竹汀亦謂序之者麻革信之跋其後者劉祁京叔皆金源遺老然則存惠亦奇士也

汪蒼巖佐領松先世家瀋陽其高祖從龍以破中後所功授雲騎尉世職少爲李都統熹所賞識都統被譖蒼巖亦罷斥禮恭親王延爲記室所居曰雨秋草堂朱子

頴詩云貧病相憐慣尊前感慨存一身仍草莽雙鬢老
乾坤山影常橫榻河聲直到門惟應結茅屋同此閱朝
昏與顧洛者甘道淵王和亭馬見三王泗徵賈筠城劉
虛白吳在田及子頴互相酬答有早閒堂詩集十卷前
七卷皆分體第八卷爲哭妹之詩第九卷爲悼亡之作
第十卷以冷巢殘稿終焉五言最多佳句如古戍狐乘
障荒祠虎結鄰亂山排遠岸孤艇入寒流泥滑駝鳴雨
風腥虎飲溪晚花依檻暝細月入雲沈高樓一尊酒秋
色滿長安黃葉歲方晏青山路又歧野花隨路發秋草
接天齊空囊逢儉歲老屋怨秋霖意味當在咸通十哲

之上其謂傅春和當位不知身任勞怨以濟國事惟含垢納污以寬厚博眾譽恐日後必有徇庇之夫假公譽以濟其私者玩愒之風由此日甚先朝之法必因之墮壞可謂卓識名言

馮文肅訪永聞上人不值詩殘雪不得駐春泥淺可踏心閒隨所之一問竹閒衲深院闌無人檐鈴自酬答莞爾見寒花盍倚花畔榻無言亦復佳清緒容靜納斜照度疏牖雙屐未忍跋門外趁春燈市聲方譔譔上人工詩有母事菴中色養惟謹老而病臂不能梳髮晨起長跪爲代梳蓋十餘年如一日李八穀齋異其孝爲寫梳

髮圖贈之文肅梳髮謠云烏兮反哺羊兮跪乳西方之

人兮豈無父母

一解

昔依佛如母今事母如佛佛耶母耶

兒不知長跪母側理母髮

二解

母梳髮兒方小兒梳髮母

已老母髮如絲兒心如草

三解

無母有母無兒有兒兒耶

母耶無諸有諸胡不思諸

四解

玉閭峰贈上人詩云人間

欲證無生果方外爭傳梳髮圖

阮文達序十駕齋養新錄舉九難之目謂求之百載歸

于嘉定成哲親王懷曉徵先生詩云行敏言尤訥身臞

道故肥百家精得善一字必求歸籟石齋詩云困學前

惟王伯厚日知近有顧亭林儒家獨起山川秀史籍旁

搜歲月深謂所撰廿二史考異也早歲與吳企晉趙損
之曹來殷王西莊黃芳亭及蘭泉司寇爲吳中七子之
選潛挈經學傳注疏義洞徹原委正史雜史無不討尋
訂千年未正之譌精通天算校正地志於六書音韻得
古人聲音文字之本編錄金石於官制史事攷核尤精
古文如鼂錯論梁武帝論詩如讀漢書諸作爲其孤懷
閱識之所寄講學上齋歸里甚早朱竹君寄懷詩閉關
囊粟全無策莫要袁安臥雪中其立朝清節可想見也
弟大昭猶子塘坵東垣繹侗子東壁東塾皆治樸學世
稱九錢詳錢氏藝文志略

朱介裴字梓廬又號小木子與其從兄育泉同舉乾隆十八年鄉科育泉爲稼翁孫稼翁少孤竹垞撫之漁洋題小長蘆卷所謂桐孫稻孫者也有六峰閣詩稿育泉官城固縣二十年罷後貧不能歸山中老民不遠一二百里各負錢米相資送有泣下者介裴詩云非關同舉厚所敬莫如兄詩任吾家事官收眾母名斯人宜有後造物太無情春草池塘夢悠悠隔死生介裴爲文恪公兄子尙書大啟六世孫祖菊塋先生年十四工詩爲竹垞所賞因言於沈山子以女妻焉山子詩家所稱沈春草竹垞誌其墓稱爲獨行君子者也介裴自序其生平

嘗之齊之魯之燕之豫之秦流寓江淮東西吳又嘗爲
學官於越授徒於婺校書於杭州官局其題高續古剡
錄云說友賈之客似孫虎也子不以人廢言筆札並可
喜昔披咸淳志博洽賅終始近乃鈔剡錄頗亦簡有理
漢剡曠於唐置縣治久矣兩火名奚惡四山地洵美一
間樣雪亭今古風流侈王謝及孫阮一戴之所履秀意
不忘杜清妙亦稱李豈可無述焉錄兮具源委掌故書
有稽蟲魚詞非詭幽事致復佳品茶品泉水鄞人曰安
之剡長時則史錄因署高名高實史所使永和訖嘉定
論列賴有此我爲剡寄公愛剡入骨髓思香宋後故條

次及今止倘能吮兔成敢避續貂皆借書似荊州欲錄
將曷以徘徊鹿胎山悵然慕煙紫主剡川書院時作也
官廣靈七年有惠政縣東南有壺山題其集曰壺山自
吟稿嘉慶丙辰引疾歸丁巳阮文達重繕暴書亭落成
過梅會里題詩亭柱遠近皆賦詩紀事介裴以病不出
集杜成二詩云海內文章伯乾坤一草亭無人覺來往
杜史正零丁冥冥憐香骨喧呼閱使星不能隨阜蓋高
臥想儀形野外貧家遠茲晨放鷓初傳聲看驛使相見
下肩輿壯節初題柱荒蕪已荷鋤新亭有高會鄉黨羨
吾廬壬申冬卒年八十有一錢衍石紀其事狀甚詳

朱介裴嘗謂遺山論詩絕句中如望帝春心託杜鵑及
未害淵明是晉人可惜并州劉越石等語又述次山一
首又亂後元都一首皆顯然自寓之詞按遺山論詩三
十首丁丑歲三鄉作丁丑爲金宣宗興定元年先生年
二十八歲在其登進士第之前四年雖其時蒙古兵已
入燕先生自秀容避亂河南至是歲寓居三鄉下距金
亡垂二十年不應預作淵明晉人之語以自況介裴此
論失考至謂集中壬辰十二月卽事詩壬辰乃金哀宗
天興元年十二月哀宗出奔河北踰年正月濟河使白
撒攻衛州敗績遂走歸德詩益紀此一聯云只知河北

歸銅馬又記臺城墮紙鳶蓋金白撒嘗放紙鳶置文書
其上至蒙古營則斷之以誘被俘者故云此說爲塙其
神山考云案定襄縣志神山縣治東北十五里平地壘
石如盤似所遺而成者元好問嘗讀書於此因題遺山
明傳納誨遊記云神山孤立平野或以爲羣山之所遺
也故又名遺山余考元集有壬寅正月九日晨起詩自
注云時欲經營神山別業又有外家南寺詩云去國衣
冠有今日外家梨栗記當年白頭來往人間徧依舊僧
窗借榻眠自注余兒時讀書處也又有外家別業上梁
文一篇自述遭亂後播遷情事頗悉合而參之蓋先生

外家在定襄故兒時讀書於其邑因取神山之別名以
自號晚乃結屋於此山所云外家別業卽神山別業也
計壬寅之歲先生年已五十三時金亡九年矣故上梁
文所述皆亂後語又聞此山下至今流水潑澗故集中
有魚多只說牛家滙何處秋風有釣船之句自注牛家
滙在神山下而晨起詩亦云只今東溪把釣竿蓋山國
而兼澤國之勝者惜平縣志語略而晦又失探本集諸
條轉使人疑於無證若傳記述遺山之形名頗可據卻
無一語及於元夫子者可知昧沒於邑人久矣余故因
白純言而詳著其實至縣志載先生聖阜危樓神山古

剎二律集中無之詩甚庸斷是贗作宜削也施北研注
遺山詩甚略當据此文補之其題遺山集中中原豺虎
忽縱橫亂世難居卻是名北學挺生劉越石南冠愁殺
庾蘭成亭編野史青燈淚舟繫家山白首情萬古詩壇
專一代墓門七字慰平生與嘗熟何孝穆詩滄海橫流
著此身中原天日照纍臣明昌大定三生夢欽叔希顏
一代人野史亭中遺汗簡讀書山下起埃塵幽蘭灰燼
今何在千載空餘老角巾皆可爲裕之異代知己

介裴論九僧詩云希畫劍南人寄駱員外有況是多閒
日應懸長臥心之句又素瑟沈幽意寒蛩共苦吟送朱

房詩也保暹金華人有石席詩及眠雲歸未得之句又
五言如吟苦人成癖年衰日長慵詩來禪外得愁入靜
中平旅夢寒應斷吟髭白恐生並佳而草際螢沈影一
句尤微至至七言則林下孤燈一聲磬清猿啼斷白雲
深爲最文北南越人有禪心混沌先詩思雲霞際句最
警又蘭芳人未采花落蝶先知二語清絕又吳楚十年
客蒹葭一夜風則江上書懷句行肇天台人鷺下秋池
靜肇句也又有送僧廬山云香連潭影直磬度雪聲微
造語最幽心弦世寡聽亦肇句簡長沃洲人簡久於外
恆有故山之思故晚次江陵云異鄉無舊識多難足難

情落日懸秋樹寒蕪上廢城又寄浙東黃轉運云十年
霜雪獨爲客萬里夢魂空到山溪竹舊憐同性直嶺雲
終爲伴身閒可見其情矣惟鳳青城人有秋燈云照回
秋夢斷靜引夜吟長病鼠驚空穴寒蛩聚短牆又姑射
山云深澗飲渴虹邃洞生秋雷句並入意又閒中吟鬢
改多事與心違則其自述於畫公者惠崇淮南人以畫
著寫物固精微楊仲宏題崇畫句也水煙常似暝林雪
乍如春乃崇書林逸人壁句詩中洵有畫在崇有自定
句圖五字百聯見別集入此集者不及十之一二惜也
字昭江東人六一詩話取字昭馬放雕盤一聯爲佳句

今觀全詩乃塞上贈王太尉云嫖姚立大勳萬里絕妖
氛馬放降來地雕閒戰後雲月侵孤壘沒燒徹遠蕪分
不慣爲邊客宵笳懶欲聞蓋頌王偃武息戈意故第四
句用閒字最有意若作盤便無著矣可知瘦島推敲一
字非妄下也他如詩愁上鬢新又餘花留暮蝶幽草戀
殘陽又夕陽云雲外僧看落山西鳥過明並昭佳句懷
古峩眉人有寄簡公紅塵無夢想白日自安閒又爛柯
山二律甚佳其一云仙家輕歲月浮世重光陰白髮有
先後青山無古今局終柯已爛塵散海尤深若覓長生
路煙霞無處尋其二云玉筍爛柯事傳聞不在疑百年

容易客一局等閒棋此著有誰見無言祇自知石橋南
畔路依舊日斜暉介斐詩以生澀苦硬爲宗故於九僧
詩研究入微如此

王受銘又曾偕乳巢瘁石汎飲西湖晚登南屏至壑蒼
憩山亭觀磨崖家人卦有云淋漓蛟螭纏怵惕風雨化
當裁白地錦覆以十丈帊四朝聞見錄謂爲溫公書武
林舊事以爲非是竹垞謂以宋鑑高宗語證之聞見錄
所記爲信受銘以乾隆辛巳卒時封君之喪未終治命
以衰絰斂丁未瘁石爲校丁辛老屋集時其子復方攝
鄆陵以詩寄還記其少日嘗同受銘偶園乳巢飲于祝

大緣陰莊薄醉留宿受銘夢人贈之詩曰攜君入座愛
君才略話三生庾信哀溪上小軒題夢緣那年春盡見
春來受銘爲賦句云芙蓉別後應無主胡蝶飛來不記
誰後見張孟載有夢緣軒詩溪上緣陰幽草畫中春水
人家何處江南風景鶯啼小雨飛花所謂溪上小軒者
非耶擇石詩有云法源爲位廿年將衰經秋原痛所藏
又云胡蝶芙蓉何處是三生石上月全荒是時擇石年
已八十感同社之無人喜故人之有子爲說舊事而疇
昔親交無一在者矣朱介斐有代書詩答武陟王明府
復云來書百有十日到開緘一幅高麗牋淡紅繭紙濃

墨字行押筆勢何翩翩從頭至尾讀了讀曲曲折折情
聯繇上言今春讀吾札頓慰飢渴六七年謂我愚籌亦
得一知君寬量眞若干

歇後語

芻蕘咨詢無加耳草木臭

味或有焉

六平六仄

中言無蟹有監州不得快意專城專案

如亂葉更堆積客比亂山相接連況復地當沁河會伏
秋防禦煩菱穉如蜂攢衙早及晚終日坎壈其身纏又
言宦海路常狹人情楚越肝膽偏莫可訴人聊訴我男
兒懷抱絕可憐因之回憶故鄉樂紅裘綠酒西湖船心
無罣礙身無縛事如星流如夢遷下言生郎第五歲能
誦學而第一篇丙午小兒日辰吉丁辛老屋堂構堅又

有聞秋塍移商邱令寄訊宋氏西陂詩秋塍復字有樹
護堂詩

嘉善魏忠節良鄉縣詩彰義門西路桑乾古渡分長羈
乘傳馬不斷出關軍良鄉漢縣唐改固節有昊天塔俗
說楊六郎盜骨處錢曉徵宿良鄉句云迎風窣堵金鈴
語過雨愁題翠黛含有聖水出廣陽郡見水經注舊志
謂卽今琉璃河宋敏求入蕃記作六里河金史謂之劉
李河王秋澗有請起蓋良鄉縣南昌子河橋渠事狀文
文山集有過雪橋琉璃橋詩朱竹均良鄉塔詩高岡故
塔臺道旁細數過客日夕羊日日羣羣來復去幾千年

往難爲詳或云多佛塔隋建縣東三里去此遠土人紛
紛呼昊天楊業之首延昭換流俗譎謬那得眞塔窪邨
近餘傳聞燕雲老將百戰死此地管鑰失北門宵來琅
琅塔鈴語獨身撒手口入虎我來塵淨雨不風吉行從
此窮西東固節驛詩安史亂始奮常山與平原良鄉不
從叛固節千秋聞間考固節縣名在聖歷年奇稱人樂
道義地史異傳潛潛金海陵諸嬖傳可刪中葺比衛姜
不嫁過齊桓如何葛王妃有敕從中宣倉卒辭王行王
其善自全妾不行王殺行行王無難悲風逼飛輪臨別
情萬端前頭燕驛近月上磨笄尖西山數峰青繞我身

斬然遂令固節驛得此名獨專或云海陵惡世宗或甚
編此事自驚絕礪錯逾眞堅參差官道樹雨洗無塵天
立馬望石岡欲去還三歎吾家自先高祖侍郎公以下
墓田均在良鄉伯熙祭酒和余詩所謂丙舍酈亭最名
勝更須西上作比鄰者也文山所過雪橋今不能實指
其所在度不踰琉璃河水左右取以名吾詩話誓墓未
能聊志北風之思

元郭畀天錫日記眞蹟四冊爲揚州吳岷東所藏厲太
鴻借鈔至大戊申客杭一冊鮑以文刻之知不足齋叢
書中有云至大元年戊申九月初六日儲叔儀隔河樓

上見呼出紙索書具酒晚飯十月初九日登舟還義興
相呼午飯出紙求字九月廿六日見湯北邨說蕭元白
曹梅南戴祖禹金子仁胡穆仲皆爲古人可惜再到杭
城愈覺舊游之落落也九月廿七日元同觀見子昂時
郝左丞坐正席子昂問都下事十月十八日游鳳皇山
萬壽尊勝塔寺有金銅鐘一口上鑄淳熙改元曾覲篆
字銘十九日見吾子行寫篆字相送仍取玉簫爲吾吹
數闋十一月廿一日方仲明寄紙求書畫情緒不佳遲
一二日下筆桂未谷藏有畀手蹟云小雪晴沙不作泥
疏簾紅日弄朝暉年華已伴梅梢晚春色先從草際歸

天錫爲明叟書竹君學士題句云髯乎爾注明叟名莫
是求書方仲明戊申十月廿一日不佳情緒筆轉精用
日記中語也

徐靈胎爲電發檢討孫以諸生貢太學棄去專以醫活
人數往來吳淞震澤間因以曉知諸水源流順逆淺深
通塞之故有興作輒正論鑿鑿持是非乾隆壬午番禺
莊滋圃中丞欲興水利將開震澤七十二港以洩太湖
下流之水靈胎謂其五十餘港非太湖下流開且無益
又將壞室廬墳墓無算唯附城十餘港濬之便因導有
司相視從其言辛卯卒年七十九平生覃思周易道德

陰符家言于醫理尤邃著書甚具創新樂府曰洄溪道
情通敏喜豪辨跌蕩江湖邵叔勉嘗贈詩云洄溪先生
今七十白髮飄然身鶴立學通老易貫羣言迹混漁樵
屏塵雜肘後時懸抱朴方湖上新營輞川業吳中山半
畫眉泉聞道春來競畚鍤雲壁雙開花藥香珠流三折
湍洄急蟹舍魚莊近石湖遲我扁舟踏紅葉我識先生
齒方壯廿年荏苒成衰狀空搜瘠渴學無成雖脫樊籠
神豈王忽枉仙帆訪寂寥且留菴糲同疏放羨君筋力
尙完堅但恨絕學無人傳猶喜著書今略就大都通邑
徧蹄筌此詩作於癸未年叔勉在翰林十年三十六歲

罷歸南巡被命集試闕下以疾不行戊子卒年五十二
黃仲則句細楷曾傳養病方檢叔勉遺筆作也

邵武城東詩話樓創於順治戊子時周櫟園自淮揚兵
備擢閩按察使山海間多竊據假道自杉關入駐邵武
以計誅叛將熊再法秦登虎等掃定郭天才耿虎閩西
安堵以詩倡樵川之上刻邵武士人詩爲一集曰萬山
中詩拂盾擲毫同書字觸皆成於此時建斯樓祀鄉先
生巖滄浪樓故三重不知何時雜祀佛氏海神而巖先
生之位退避屋角朱竹君試士至邵武知府事武陵朱
景炎請釐正之於是蠲除再重中坐一巖以華谷並滄

浪更以贈二嚴詩之戴石屏位左以建詩話樓之周櫟
園位右竹君爲楹語云隱釣風分七里瀨品詩意到六
朝人翁覃溪謂自唐之司空表聖宋之敖器之皆精於
評語爲譚藝家所推而所自作皆未能與所評相稱若
嚴滄浪五言數篇稍與所談微中闡怨懷儂諸小詩亦
不減唐賢風味石屏有論詩十絕其論宋詩曰本朝詩
出于經此人所未識而復古獨心知之又謂胸中無千
百卷書如商賈乏貲本不能致奇貨此皆務本之言
賈雲臣孝廉虞龍有謙益堂詩集暑夜檢亡友龔子鮮
遺詩愴然感懷云閱世不一人萬古共明月浸我庭除

間浩浩如可掇無人共幽賞獨對亦清絕長天寄塵海
生命輕一葉低心避訕謗縷縷變元髮此意訴何人茫
茫隔存沒存沒何獨惜念此身後名之子美文藻早歲
蜚英聲詩成千萬言筆力戈矛橫譬彼江海濤適與天
風迎斯人今不見太上難忘情賸有手種竹夜夜搖空
明讀之令人增友道之重與朱竹君王禹卿交甚密有
秋雨懷竹君及夢樓齋中夜話諸詩竹君有與雲臣論

史記書

吳江張秀才鴻勛工畫有白蘋江驛遠紅樹客帆孤之
句王德甫詩桃根渡口恩恩別聞向樅陽作客游欲寄

生綃煩畫取白蘋紅樹五湖秋

會稽范蘅洲太守家相說經鏗鏗其三家詩拾遺就深
甯王氏詩考蒐補刪正雖不及後來左海陳氏父子之
書較九經古義古經解鉤沈採掇已爲賅備又著詩瀋
二十卷則斟酌於小序朱傳之間而斷以己意者也有
環淥軒詩草維揚云綠楊城郭暑初銷十里秋雲覆畫
橋何事人間最惆悵月明風細聽吹簫蘅洲初官比部
錢竹汀詩歷下弇山詞客盡風流重見白雲司謂蘅洲
與王穀原也

顧復初舉經學得召見問治道之要對曰當以儉德示

天下王德甫重過梁溪東顧祭酒震滄先生云官梅送
別又經年舊疾春來尙未痊紫詔崇儒聞晉秩青衿養
德待陶甄縣中牛酒應頻致門下麟經定並傳只惜雲
帆風正快未能枕鄰小流連程魚門云先生家居時足
不出戶外偶從他處歸遇風雪至家門旁皇無所措或
怪之曰吾將往顧某家耳或曰此門卽是隨叩門入里
人以爲笑柄蓋專心篤學如此此其門人華希道所記
德甫有句云傳說梁溪風雪裏歸來不省舊家門其春
秋大事表冠以乾隆壬申新春御筆賜司業顧棟高七

言律詩二首

于紫亭待御宗瑛爲襄勤公孫書學平原兼通畫理山水仿雲林得其三昧間作寫意人物及蟲魚花卉家風清素簡淡無營性好吟詠亦多不存稿子滄來廉使齋圖輯爲來鶴堂詩鈔四卷宿馬氏園句云夜半星辰大霜餘草木堅其游馬氏園書後云去年九日與冬翁竹溪益亭游馬氏墅時分賦五言繼復廣和之而竹溪獨無詩今日益亭書成此卷前後得詩四十五首清言賅貽依然坐我於濠濮間見三君子步薊澁陟煙邱立方亭之上笑指西北碧綠諸峰段段涼風吹其眉宇也天壤之技以能留其迹者爲妙昔人謂碁不如琴琴不如

詩畫以其隨處登幽人蹤跡耳余詩雖拙固當與二君
常留其迹竹溪吾禪友持此以示想當微笑乙酉二月
二日文小思閒亦頗清脫

先高祖侍郎公有椿蔭堂詩存稿張南山聽松廬詩話
稱其自題容我山房云退思自願身無過守分方知樂
有餘釀酒先栽三徑菊看山更擁一牀書謂可想見其
爲人容我山房在良鄉丙舍張白純開東蘇園公去疾
皆先友相倡和者也游上方山句云野竹漸交風葉影
嶺花初破露苞香義嘗取竹漸花初四字名其藏書之
閣園公中順天己卯鄉試與公同榜

金匱杜司寇玉林乾隆甲戌進士辛卯由刑部郎中出
爲四川驛鹽道金川用兵督運中西兩路糧儲是時大
軍駐美諾餉道窶遠常不繼所經木坪山神溝礪山谷
縣延仰而升天俯若瞰井奇石矗立羊腸盤曲攀蘿附
葛前人足躡後人之肩蛇行獸伏而進舊設每卅里爲
一程程列千夫夫負三升往往半途而蹶越宿而達及
其還至故所則後來已委糗囊于地所失亡多公按其
險易一析爲五或析爲十而均其夫三居守七負戴不
得越所畫之疆循環旋轉更番而休密邇而替食宿有
常遂免於逃亡顛蹶而軍食亦無匱乏當羽檄旁午之

際尙復搖豪擲簡撰述斐然其登雅州城樓云大渡河
西畫角聲投鞭撫髀若爲情空慙司馬能傳檄漫說終
軍欲請纓春盡林香猶作瘴雨餘山氣未全晴關心最
是從征客雪沒弓衣夜斫營入長秋曹奉使讞獄者七
鋒車所至殫心平反乙巳四月以覆按戶部員外郎海
昇妻狀不實謫戍伊犁越一期詔起本部郎中卒於涇
州旅次

歸安葉辛麓官南陽府時行縣桐柏有句云計畝秧論
石開山樹架樓桐柏爲豫省南界小邑田畸零不成頃
畝以種秧之多寡論價也少從邑諸生吳三錫學贈公

以病失館貧甚不能具束脯欲改業吳曰此子何可不
讀書吾將挈而就館且飲食之何患焉既成進士曰吾
非吳先生不及此苟一旦溫飽必與吳氏共湖之人兩
賢之與朱笥河同年相得居城西南笥河居日南坊之
李鐵拐斜街相距遠笥河每出雖往城極東北必迂道
相訪著有易守四十卷子紹樞字琴柯亦嫻吟事客暨
陽絕句云枇杷庭院長莓苔小閣輕陰燕子來吟徧江
南花落處斷腸人是賀方回

高郵沈旣堂甲戌釋褐年二十四乙酉出守太平在郡
十六年資最深每考績輒有尼之者或勸赴省曰求之

得恥也不得更恥也辛丑授河東鹽運使甫一年以母老請終養歸不復出家居廿餘年以詞林耆宿爲詩壇祭酒杖履吟詠有香山洛社之風九月六日余禮耕羣玉山房謙集次瑤圃韻云浩來衫袖久淋浪乘興還教更舉觴華髮心情非少日晚花風味是斜陽燈前詩卷從新讀霜後園蔬取次嘗莫訝深宵飛醉墨老年行樂更無方嘉慶丁卯中秋日卒

毛海客寄內詩云篝燈佐讀苦相依太息黔婁百事非豈有雄文傳狗監空勞清淚滴牛衣釵荆裙布家風冷麥飯蔥湯活計微他日鹿門歸舊約絲緡共理釣魚磯

此詩與白水貧家味紅羅嫁日衣之句清約相似海客
爲毛嶽生之祖名大瀛寶山諸生善屬文及詩試輒不
利五十外以薦舉得官教匪起湖北蹂躪陝西河南四
川等處大府奏君隨營以功擢知縣尋又擢知簡州土
賊復起城守踰時援不至城陷罵賊不屈死著有戲鷗
居叢話洪稚存記其客山東巡撫國泰幕及吳門項直
菴客浙江巡撫王直望時事可爲世誡其文曰毛君爲
幕府賤奏最工業此者二十年其在山東巡撫國泰幕
幾十年國泰者君在京邸時素識約爲兄弟者也出官
山東卽挾之以行國性暴戾妻子僕隸皆若不可一日

其居獨重君始終無纖豪芥蒂君質直嘗面數其過國
受之不校也國盛怒時或至撲妻子刃僕隸獨得君數
語卽解以是署內外事君如神明國亦飭所親下人奉
君若奉己君或赴試則一府中環以泣阻其行若勢不
可留則各囊金爲贈君一入試則所獲無算君亦隨手
輒盡不餘一錢也在幕府日國四鼓卽促君起然巨燭
與分案治官文書日出事始竣國讀書不甚分句讀願
酷嗜作制舉文日必拈一題強君共作方御史錢灃之
特糾國及山東虧缺庫項也特命親信大臣偕御史晨
夕馳往勘實其弟國霖覘知之募善走者先半日馳抵

濟南國倉皇喪魄時署中積金實無數因乘夜運入司
庫及運司首府首縣各庫以補缺項然存金尙纍纍
廨後有珍珠泉深丈許遂昇至泉側沈之後撫臣明興
濬池尙得金數十萬蓋國贖賄如此事大露逮國入都
下刑部獄治罪君亦隨入時以諧語寬解一日國檢衣
底出一大珠圓徑寸授君曰留此無用以遺兄君曰弟
事解此卽可充貢僕無用處也居久之國忽得妄耗謂
君曰事可無慮兄處此已久可暫出洗沐君乃出然國
卽以其夕賜死君偕其弟入哭檢所爲珠已失之矣余
識君在武昌總督署時同署復有吳門項君字直菴忘

其名項君故浙江巡撫王直望容也方王遭母憂擁妻妾居會垣并日事讌會爲人所發王亦知罪且不測而積重貲至多因闔門召幕友散給之數或三萬五萬不等屬曰若無事歸我半事不測則諸君盡留之時項適省親歸不及預後數日至王嗤之曰日前少有分餉而君不來何遲蹇若此項固寒士又極知足則對曰暴得重金不祥前日卽在亦不願預王笑置之居數日王甘肅匿災冒賑及監糧案併發卽日逮入都諸幕客竄已無影項獨送至鎮江王強項曰必送我清江浦俟登陸乃返項允之同舟渡江王忽慨然曰幕中某某吾待之

極厚竟無一送我者今走千里反在君吾愧君甚因懷
中出一硯曰此宋蘇文忠公物也籍沒時獨寶此不忍
舍故尙在耳以贈君儻入都後蒙恩不死異日必措萬
金贖硯復賦詩一章贈項王入都後卽伏法後項幕橐
稍裕感王意別購一室貯此硯及所贈詩不一歲室毀
于火硯及詩並煨燼後幕客得王重資者五年內不病
死卽子嗣天絕無一終饗其利者吳江史善長赤厓有
抵武昌節署項大階
鳳諸君招集獲秋帆制軍手問詰旦卽行
賦此爲別一首階鳳當卽項直莽其人
周書倉永年本餘姚人繫歷城籍結茅林汲泉側因稱
林汲山人年弱冠在灤源書院能讀通志堂經解時沈

子大光祿主講席極獎譽之嘗爲題水西書屋藏書目錄謂其百無嗜好獨嗜書歷下書不易得生故貧見則脫衣典質務必得得則卒業乃已學思堅明兼通佛乘與益都香草生李文藻修歷城志以詳慎稱乾隆辛卯成進士被徵較四庫書授編修始朱竹君以翰林院貯有永樂大典內多古書皆世闕軼表請官校理且言所以校輯者書倉掇拾摭摭得永新劉氏兄弟公是公非諸集凡十許部咸著於錄見收藏家易散有感於曹石倉及釋道藏作儒藏說約桂未谷築借書園聚書其中招致來學未就而歿余所得書有藉書園圖記者皆善

本桂未谷久雨初晴同林汲夜坐詩把酒談詩妙入神
空庭月色解相親欲眠再起披衣坐不見清光已數旬
瑤華道人弘昨誠郡王允祕子

仁皇帝諸孫初封輔國將軍職御前能書畫乾隆間加
恩爵貝子歛縣吳寬非匏以召試中書爲邸中上客嘗
譜新樂府每一詞成坐非匏左席召伶人遞進倚聲按
譜一時豔傳王子春嘗邀彭芸楣沈椒雲胡印渚劉金
門鐵冶亭那東甫阮伯元七人同游萬壽寺主人寫七
松圖便面冶亭題一絕云七人分坐七松樹巨筆寫松
如寫人謾謾清風滿懷袖一時同證大夫身王蘭泉嘗

取元次山句製魚麥船久零落無存矣予告南還之日
主人畫柳波雲舫圖爲贈系以詩云春風煙柳綠絲絲
爲繫扁舟送別遲四十年來鴻雪蹟三千里外樹雲思
薦新櫻筍梅時雨感舊賓朋畫裏詩桃李成陰身恰退
名臣名士兩無虧海天霜鶴指前程吳會雲間結隱盟
髮白早應經百戰心閒久不動三彭能無祖餞傷離別
有幾林泉荷寵榮豔說葛山堪繼美此情那復憶尊羹
蘭泉歸買一舟卽以柳波雲舫名之詩云魚麥休懷舊
日船柳波雲舫足洄沿恆春橋在榆陰裏跛腳看書自
在眠王鐵夫題句云正好漚波駕輕舫相從柳上注漁

經鐵夫以丙辰買一舟將妻子就官南下桂未谷書三字贈行曰漚波舫故云

成哲親王詒晉齋集太平門箭順治年間取江甯時譚秦都統所射也詩云天塹長江霧杳冥豫王夜渡北關局早驚劇鎮兵戈亂苦望先陵涕淚零叔黨漫能穿甲札伯勞祇有貫丁甯太平門上將軍箭鐵葉于今飲赤翎譚秦舒穆魯氏隸滿洲鑲黃旗揚古利從弟也土人訛爲澹臺箭

維州本漢徼外羌冉駾地蜀姜維征羌駐此因有姜維城唐卽其地置維州後陷吐蕃號無憂城及李德裕治

之亦屢叛屢復五代蜀州內徙改縣曰保甯宋改威州

元以州治保甯縣并入明於州境析置保縣本朝雍正

五年省威州入保縣廢茂州今其地尙稱茂州橋而大

金川乃敢播爲謠曲云殺至維州橋此其悖叛之志隱

伏已久乾隆十三年大金川頭目郎卡跳梁不靖熙康

土舍色勒奔投誠委授副長官司職銜管理駐牧雍正

八年部給印信號紙爲安撫司乾隆七年其子莎羅奔

承襲地距四川保縣五百四十里莎羅奔恃其險遠自

稱大金川以舊土司澤旺爲小金川丁卯莎羅奔游食

各土司居勒烏圍其兄子命經略大將軍傅恆率師討

郎卡翼以爲奸居噶拉依張廣泗督大兵進駐澤旺所居之美諾官寨而用其

之弟良爾吉從征良爾吉本與莎羅奔女通以軍情輸

莎羅奔訥親張廣泗亦齟齬不合以致久無功御製

賜傅恆詩曰一矢靖天狼傅恆至則斬良爾吉奏凱納

降纜屆 師臨其境 郎卡乞降 赦其罪 是役也 傳恆封一

兩月 聖母徽稱 邵叔勉 詩讓 善尊文母 酬庸建上公 自十三年平定之後 至二十三

年 郎卡復與革布什 咱搆釁 打箭爐以外 舊有九土司

正長河魚通宣慰司曰沈邊長官司曰冷邊長官司曰

瞻對安撫司曰喇滾安撫司曰把底安撫司曰單東革

布什咱安撫司曰緯斯甲安撫 泰檄令撤兵 支吾不退 增修碉寨 侵丹垣 劫巴旺 緯斯

甲布三十一年 郎卡遣人投京 求賞請發印信 郎卡初

與小金川為仇 驅逐小金川頭目僧格桑 澤旺 後更女

之以為婚 而僧格桑亦與鄂克什搆釁 郎卡死 子索諾

木又抗違約法 阿爾泰與提督董天弼帶兵彈壓 終莫

能服三十六年始擬進討調副將軍温福率滿洲兵自

雲南軍營馳往温福司西路攻破巴朗拉取達圍克資

林在南路破約咱卡了諸寨桂林罷阿桂繼之自達烏

甲爾木翁古爾壟至僧格宗既克僧格宗徑擣美諾温

福亦克明郭宗至美諾取布朗郭宗收底木達禽澤旺三十七年小金川平僧格

桑棄父攜妻孥走依索諾木因卽移師討大金川三十

八年温福由西路阿桂由南路以進温福由功噶爾拉

駐守底木達以扼美臥溝要隘僧格桑自美臥溝竄入

佔據底木達布朗郭宗並擾及劉秉恬所駐之簇拉角

克糧臺截木果木後路直至大營先劫礮局西路賊擾

後斷水道温福攜百餘人衝出遇賊身殞

其後戰於木果木遇害而失釁拉番語小南路因收兵

而出阿桂收戮降番斷其內應分路掩擊並安章谷後

路臺站自當噶爾拉全師而出退據翁爾古壘為

再進 以阿桂為定西將軍授之定西將軍印 順治間愛

計勝 阿桂改由西路副將軍明亮豐昇額由南路以進

所得 阿桂由西路日隆寨進攻十月廿九日克資哩木拉斯

抵普爾瑪阿喀木雅東溝及斯達拉阿喀爾布哩碩藏

噶山梁色布色克美美卡東瑪色渠十一處礮卡三十

日攻克阿喀木雅山上大礮直取木蘭壩得鄂克什官

寨南路亦於廿九夜攻克得里河北喇嘛寺日寨取赤

爾丹思及河南之得布甲五晝夜連克路頂宗明郭諸

險隘並攻得別思滿兜烏八卦礮克復美諾海蘭察由

別思滿於初三日直壓帛噶爾角克取岱都喇嘛寺隨

攻克布朗郭宗底木達其河北河南各寨落以次攻獲

大板昭馬爾當曾頭溝各寨俱降牛汗各寨亦投順收

復攬拉進勦促浸促浸 四十年阿桂直搗勒烏圍克賊

雪橋詩話卷七

美求恕齋

要害 各路於正月初十日進兵阿桂搶過谷噶了口入

奎林以皮船渡至博堵得其木城二座明亮亦於初十

日克馬尼十九日盡得木溪礮寨二十四日攻克卡卡

角山梁三月阿桂攻克羅博瓦山礪六月克色朔普喇
穆喇穆山梁日則了口喇穆喇山梁爲此路第一要
隘日則了口亦勒烏圍要路海蘭察等攀援超越雖風
雪霧雨不避艱險石壁陡滑前人之踵幾及後人之頂
以手引手 宜喜山亦賊要害豐昇額攻之一年未下乃
蟻附前進

命赴西路而明亮駐宜喜山梁 達爾圖山梁爲宜喜要

桂札卽馳往宜喜七月初六日攻克達爾圖山梁安設

營壘十八日阿桂攻克該布達什諾大木城十九日克

色朔普下各礪焚燒格魯五角寨落十月攻克默格爾

山梁明亮攻克日旁一帶礪寨和隆武爲將軍和起之

子和起前在關展軍營追巴雅爾爲逆回所害給世職

此次攻得日旁全係和隆武之功和起可謂有子見

高宗甲午御製詩注乙未正月阿桂攻克康薩爾山梁

礪寨木城四月攻克木思工噶爾克了口等礪柵明亮

攻克宜喜甲索等處礪卡五月攻克遜爾克宗副將軍

豐昇額力居多六月明亮攻克石真噶賊礪七月阿桂

攻克舊則大海毘色爾山梁並拉枯喇嘛寺八月攻克

勒烏圍賊巢十月攻克西里第二峰十二月攻克科布

曲素隆古山梁等處
獨寨明亮攻克獨古木寨落及槍
佔乃富山梁丙申正月阿桂進據則朗拉克了口駐噶
占山梁明亮進攻甲雜賊寨西路肅清渡河攻勦雍
中喇嘛寺并力合擊噶喇依刮耳崖爲噶喇依俗名之
訛一作賊旣窮蹙其大頭目并索諾木之母及其姊妹
噶爾崖

相繼投我軍
官軍合圍以後其頭人布籠普阿勒木等
先後詣營降索諾木之母阿倉姑阿青等

在河口之甲納雜爾寨聞官軍已得雍中等據河口阿
倉等惶懼無所歸遂至軍營投降並遣人回巢招諭索

諾木乃遣其兄岡達克
朋先後來營皆就拘繫賊巢穴在噶喇依有川環其西

南北三面我軍合圍斷絕水陸圍賊四十餘日索諾木

乃於四十一年二月四日率其兄弟及大頭人挈男婦

二千餘人出寨跪捧印信罪人斯得大功告成午門受

俘組牽索諾木等七人與僧格桑首函并獻
先是索諾木等見官

雪橋詩話卷七

三求恕齋

兵深入出僧格桑屍乞降體紅髮數莖猶可辨識云右爲成哲親王平兩金川

詩注語敘兵事本末甚核謬爲之逐段補釋其平金川
頌已錄入文經兩金川皆姓拉爾丹大金川亦名赤佔
謂居於大河濱小金川亦名赤濫謂居於小河濱者乾
隆丙申四月廿八日紫光閣凱宴成功將士所俘番童
有習鍋莊及斯甲魯者卽番中儼戲也命陳之宴次

御製告成太學碑文並勒銘美諾勒烏圍噶喇依三碑
當噶喇依圍旣合大功垂定

高宗於二月初旬謁告 兩陵十二日駐蹕桃花寺紅
旗適至遂奉

孝聖憲皇后祝釐岱宗告成 闕里成邸詩有云仲月
春衣御游星露布馳橋陵申愛慕帳殿侍徽慈百世崇
壇杏千年祕檢芝聲靈齊岱嶽舉錯協宣尼語皆典實
積水潭一名淨業湖其北岸成哲親王賜園在焉卽傅
文忠舊第甲午四月初六日賜新居恭紀云往者樓臺
渾有地載來書畫亦盈船東牀舊感縈回在嘉樹陰成
近十年仲春園居云小園春事好暇日遂幽尋試棹方
塘水鳴禽舊柳林樓臺起已久花木發能深馬宅殊今
昔猶餘感物心丙午春

高宗巡幸五臺王留京三月朔雨後寒復雪有句云擁

爐漫下書齋幌多恐春寒在晉州又云心殷好風日送
暖到中臺三十五得孫四十六髮已半白其夜坐句云
事繁書慰夜心短歲辭人以工書命書 裕陵神功聖
德碑晚年有自怡二首云自笑書成債猶愁歲欲殘栖
遲深屋底拳曲凍毫端老眼垂垂暗名家的的難終年
無合作將底世人看世未稀真鑒吾惟取自怡麤材貪
撥悶暮景厭徇知服散行移晷焚香坐閱時八方求道
後無限夕陽遲雖復 玉音褒讚早勒貞珉得失寸心
不自滿假嘗記客問瓶菊耐久之方告之以用炭火輕
燒折枝處而護以黃蠟瓶宜古瓷火氣退故也客笑曰

火氣退者亦有用處此可觀也尤爲知道之言

乾隆以來多以宋四六體施諸歌詠生硬槎枒競相放
效卷阿矢音之作尤喜揣摩聖製助字成語雜廁於律
句間名家如坤一正三亦皆不免至擇石齋樂游原句
云甯申岐薛亭臺里車馬衣裳士女風一字一頓尤爲
古法所無其他喜用俳語凡近語者更無論矣獨詒晉
齋諸作密栗蒼潤玉振金相其題李唐畫山谷廬山觀
瀑小像云匡廬獨坐觀飛瀑晞古當年妙寫眞未必王
維非自像那妨黃憲亦前身世途一任呼牛馬天漢千
尋洗髮塵

二聯並用山谷自贊語

竟取二張圖畫在未知下筆定

誰親張大同張子謙俱曾寫山谷真題李時勉詩箋云每撫詩箋感昔

賢墨痕滿目意淒然金瓜事慘洪熙世木校身危正統

年指鹿朝廷誰直道多魚將帥竟生還諸生亦見何蕃

傳肯為孤臣伏闕前題王元美敬美小像云南宮捷得

鳳皇毛見元美賀敬美捷南宮詩太息深冤伍相濤見李于軾轍弟

兄同伏闕京攸父子正操刀雅懷未用新桃綬宴坐何

妨舊椹袍散失琅瑯先德像只餘兩紙想風騷元美有琅瑯先

德像贊題管道昇九歌圖云聞道嬋媛訴女須深心豪素

竟何如謝公叢菊論心際見疊山集鄭老幽蘭寫淚初雲林題所

南蘭詩云淚泉和墨寫難疑雪窖羈孤還五國江潭哀怨又三閭鷗

波亭上情無限白首王孫有故居登日觀峰云不踏層
雲漫五年東峰黃鵠只飛旋獨扶冉冉孤生竹略數青
青九點煙聽履徐行羣宿上振衣遠想大風前天雞唱
出滄浪日應是桃都影最先題黃石齋弔周中丞詩卷
云芒屨野店繞風塵絕學孤忠共致身石齋還山詩有
不知野店芒屨
者曾過玉皇香案來之句輔嗣談經無後輩景純推命竟斯人石齋
有三
易洞璣其殉難符自推之數臣心慘惻懷屠狗國事倉皇到泣麟見
齋前緩聲歌哭友遺篇關厄運他時賈筆過亡秦餘如穹窿
道中云谷深抱日風來暖樹古遲春鳥暝稀題宋人學
士登瀛圖云雪飛乍斫蓬池鱸雲近羣扶晉水龍懷錢

擇石云陽里病忘心自惜子猷乘興事徒傳贈費莫文
襄勒保云興甯置宴崔公笏邛棘籌邊李相樓鬢絲云
光陰夜壑藏舟是筋力秋山策杖知詠雞缸云客醉不
妨中夜舞酒闌應到曉窗啼皆可誦

道光辛卯程春海侍郎題倉龍集云右成邸詩草一卷
詩凡廿二內失題者二繡夫姊丈得於令兄芝房處無
款識有送吳祭酒錫麒還里詩刻入詒晉齋帖有謝十
色畫筵詩則謝先大夫弄於予家不必款印而斷其無
疑者也眞草隨意天機盎然逋峻之法全收駟駐之神
亦妙較矜持時不啻過之詩則五古得晉人意七古得

蘇長公法律體兼初中唐而波及北宋其橫翔捷出名
論超雋則由學博而才贍位重而道高也且夫身處朱
門而情游江海地居枝昵而友接佳流懷抱之際尤難
涯涘傳所謂雅道邁于東平文藝高於北海者庶幾見
之矣先大夫曾游梁苑頗甘楚醴投贈之句貫若文珠
徇知之書光乎舊篋而緣苴生後賓客先傾鳳尾畫餘
賢藩亦謝反復斯卷不勝慙然按春海尊人爲蘭翹學
士乾隆庚子以第三人及第丙午倬直尙書房乙卯冬
卒於山東學政任有安玩堂藏稿成哲親王以道光二
年薨年七十二謝十色畫箋詩詒晉齋集未載

王禹卿耽禪學自言吾詩字皆禪理也未第時嘗隨全
斗南侍講周海山中允兩冊使浮海之琉球人傳寶其
翰墨由編修大考第一陞侍讀出守臨安以屬吏事鐫
級去任遂不復就官其揚州逢琉球國謝恩使者馬宣
哲鄭秉哲留飲舟中述別話舊慨然有作云海天誰信
此相逢情話邢溝半夜鐘萬里祕書歸日本經年季子
聘周宗月高更酌麻姑酒潮響還疑辨岳松別後相思
何處寄瀛波春靜臥魚龍流水年華重感獻隨槎曾向
十洲居暎花變女春鳴瑟秉燭仙童夜侍書斷素零縑
鴻爪在紅塵碧海雁音疏漁竿仍作滄洲客慙愧王門

舊曳裾麻姑山爲琉球屬島產酒絕佳辨岳爲中山
高處多松柏斗南尼奇哩氏官至侍郎有乘槎集海山
官至尙書謚文恭有琉球志略十六卷武英殿排版頒
行禹卿弱冠交姚姬傳介以交朱子頴三人者年相若
也禹卿差少於子頴子頴壬午舉人出禹卿之門亦嗜
釋氏之說嘗獨往大峩絕頂觀所爲菩薩光者禹卿詩
近袁簡齋子頴詩工力愈於禹卿禹卿謂其似李太白
高達夫

惜抱軒書錄姚姬傳分纂四庫書日時所屬稿也時紀
文達爲總纂官文達天資高記誦博厭薄宋元以來儒

者以爲空疏先生頗與辨白文達雖無以難特時增損其所上序論令與他篇體製類焉編文集時不以入錄李申者謂卽此數卷而先生文章精嚴之旨略具從孫瑩爲之補刻其論南軒孟子說云解交鄰章云所謂畏天者亦豈但事大國而無所爲也蓋未嘗委於命而已故修德行政光啟王業者太王也養民訓兵卒殄寇仇者句踐也未及周平王惟不怒驪山之事故東周卒以不振其辭感慨激昂皆爲南渡而發王應麟嘗論朱子詩傳至秦風諸章辭氣憤發有異常體若栻之心亦猶朱子之心而已論通鑑地理通釋云是書之於通鑑與

胡三省注並爲功甚鉅篇首本應麟自識書後人移於前以爲序內云土章執徐橘壯之月是蓋元世祖至元十六年庚辰之八月也宋亡已三年矣自識乃用陶潛不書劉宋紀年之意書內稱梓愼爲梓謹猶爲宋諱至於周形勢末篇所論之語意皆自寓舊臣故國之思是可尙也論王禮文集云王禮字子讓廬陵人元末在全普菴撒里幕府後屢遷廣東元帥府照磨明興不仕聘爲考官亦不就前後集各十二卷首有劉定之序謂其託耕鑿以棲迹於運去物改之餘依麴蘖以逃名於頭童齒豁之際其文奇氣稜砒猶若佐全普菴時以未裸

將周京故也有與子讓同出元科目佐石抹幕府其氣
亦有掣碧海弋蒼旻之奇及攀附龍鳳有作嘻暗鬱伊
捫舌駢顏曩昔氣澌泯無餘矣定之是言蓋以譏劉基
也案錢牧齋論翠眉公語實出於劉牧翁持論婉孌然
亦皆有所本如此

楊龍友殉難時桐城孫武功監軍與之同死後監軍子
收其骨併龍友合葬桐城北楓香嶺姬傳題龍友墨蘭
竹云秣陵春盡倍銷魂紅藥花殘綠萼存被惱更尋修
竹徑千叢原是畫時孫江左風流染翰時越疆同裏故
人尸風蘭露竹容相憶寒食曾無上冢兒

羅兩峰爲金壽門詩弟子歛縣布衣僑寓揚州自詭前身爲花之寺僧以雍正十一年生嘉慶四年卒年六十七游京師最久晚歸揚州翁覃溪送行詩有樽酒城南秋雁飛之句世多傳之至有繪爲圖者嘗爲朱子穎寫眞橫幅中惟寫萬竿修竹絕無他物子穎自題云勳名無復上麒麟賸有丹青託故人萬里來歸逢汝老一官落拓遂吾眞籌邊經野功何補殺粉調鉛技益神橫掃琳琅三百个滿添風露到閒身子穎有用世之才而未竟其施嘗師事劉海峰海峰序其詩稱爲奇男子有儻何一世之心觀其夜投礎硎山句云念抱經世心終年

走窮谷坐被山鬼愚我德豈不淑其浩落蟠鬱之概可見一斑起家四川簡縣知縣獲劇盜引見

高宗知其能繪事命作畫以獻擢敘永同知重慶府知府以當事故例宜引避改補又以應償官帑數千兩貧至不能歸乃躍馬仗劍觀戰於雲南永昌又踰美諾之巖入小金川之阻出岷山外千餘里覽壁壘戰鬥之狀以發皇其志氣詩益雄駿多感激豪蕩之音移守泰安招兩峰至陽魯任郡廨三閱月凡三登岱宗圖記其勝爲兩峰序登岱詩轉兩淮運使俯仰冠蓋商賈之間忽忽有所不樂時見於其詩嘗重修宋制置使李公副統

姜公雙忠祠蕭孝子曰曠祠姚姬傳爲作碑記

孝子事在康熙

時墓在梅

花嶺東以病歸京師時爲乾隆四十五年庚子王禹

卿有淮上贈別之作子頴卒其子白泉蒼崖手錄其詩

白泉任江安糧儲道延姬傳禹卿論次之曰海愚詩鈔

十二卷乙巳刻成自題畫松云破紙松條墨潘青不妨

孤賞見娉婷人間應有神仙術欲趁秋風刷茯苓其爲

胡慕尹題山水秋雲幾疊化晴峰敢謂官衙潑黛濃解

識維摩禪悟妙焚香煮茗話南宗一作題畫寄石莊上

人蓋一詩而兩書之刻集時兩收之未及校正其感賦

一絕云世事遷流感萬端雲山重對涕洟瀾當年朝退

繙名畫曾侍晴窗雪後看蓋蜀道逆旅中客有以松雪畫冊出示熟玩之知爲其尊人涵齋都統所藏物也兩齋侍郎阿肅伊爾根覺羅氏深入佛海乾隆丁酉偕梁階平相國典順天鄉試撤棘後正定王椒園廉使來謁侍郎曰子前路未可限顧僕一言相贈他日得志幸勿闢異端椒園愕問何謂也侍郎曰適見子勇形於色聊相規爾子誠欲闢異端試言異端何等椒園以佛老對侍郎曰孔孟時有楊墨無佛老以佛老爲楊墨乃後儒之言非孔孟之言也夫異端異其端也所謂端卽孟子惻隱羞惡四端是也苟其人不仁不義無禮無智乃

爲楊墨之弊若其言爲仁爲義爲禮爲智則非楊墨之
弊也非徧觀其言烏能別乎今世士君子罕行孔孟之
言惟以闢佛老張門戶以自鳴爲儒其下者病天堂地
獄之說不便於己所爲亦姑詆之以紓其怖憚徒爲佛
者所憨笑皆未必爲聖人徒也其言至爲警動侍郎以
甲戌通籍嘗直上齋累官少宰降光祿寺少卿詩亦雅
澹西山晚步云緩步西山顛峰嶺浩無際入谷猿乍啼
驚人鹿已逝滿地松花香一澗水聲細嵐光撥客衣夕
陽景翳翳牛羊迤邐歸野老柴門閉鳥鳴深樹中白雲
如水洩

西湖舊有花神廟李敏達督浙時自搯其像廁花神中
後樓別搯小像并有正夫人及左右夫人像

高宗庚子南巡至浙幸花神廟召對大學士嵇文恭詢
以花王何籙俗乃爾文恭對曰此李衛像也東樓二女
其所最寵者曰旁坐者何人曰此季麻子也善說稗官
野史衛善之故使侍側餘著蠻鞞衣短後衣皆謙從也
曰衛本賈人何敢狂悖因降旨命署布政使德克精布
毀其像投諸湖而重搯湖神祀之後樓則搯花神花后
二像王德甫詩云雲作衣裳月作鈿蕙幃春暖更清妍
如何瑤島如花女卻伴僮奴五十年時德甫隨蹕西湖

親覩其事也

法梧門題常理齋愛吟草云天地重奇節丈夫留浩歌
魂歸遼海壯詩比蜀山多戰壘雲生色崖碑血不磨浣
花人未死延爾草堂過理齋名紀奉天承德人乾隆丁
丑會試錢擇石充同考官所得士由四川西充縣知縣
遷崇慶州知州癸巳大學士溫福進討金川在木果木
支放糧餉素工射賊至射斃數人賊攢刀刺之遂被難
其天雄關題壁詩云江曲真成字似之牛頭袞袞上來
遲放懷今古無窮思問著山僧總不知擇石入蜀有詩
云常君通籍古留都言貌居平似腐儒突見牛頭詩灑

落直教馬上淚模糊金酋已逼捐生竟玉骨難尋返葬
無心事山僧應不解招魂萬里仗巴巫又慰忠祠句云
維忠死于事有彥及吾門謂理齋及孫君維龍也孫庚
辰進士亦釋石門人理齋甥長炳亦於木果木禦賊殉
節

曹來殷律句如東風樹樹生紅豆南浦迢迢送綠波客
路正當歸雁後鄉心多在落花初趙璞函律句如層層
露檻全臨水葉葉風帆直到門老去評量絲竹肉客來
贈答影形神夕陽沽酒柴桑路夜雨題詩苦竹州出世
尙仍居士服浮家擬署散人銜皆有致璞函屏陵呂侯

祠云地控荆湘此最雄英名猶在霸圖空生能開卷分
陰業死得封侯尺土封竟遣白衣來北岸渾忘赤壁縱
東風油江遙接蠓磯水嗚咽還應怨阿蒙春感云江樓
一望草芊芊寒食東風欲禁煙柳外誰家閒試馬花前
有客倦聞鶻春愁似水當三月好夢如雲已十年贏得
鬢絲今漸改生涯禪榻亦蕭然吳充之題其詩卷有云
鯨魚絕海蒼枝翠欲繡平原趙勝身其爲同輩推許如
此洪北江謂王趙爲患難交故詩傳所錄爲多要其詩
才在七子中固當舉首乾隆癸巳六月以主事殉難昔
嶺同時併命者如無錫王日杏會稽吳璜皆能詩嚴道

甫寄蘭泉句云心惻國殤同日殉手書露布萬人看
蘊輝廉使巴尼琿以壬申繙譯舉入官兵部員外郎從
軍金川嘗繪金江淬劍圖趙璞函之子少鈍侍郎時亦
在木果木軍營題長古一首云我來西嶺觀軍容和門
高捲紅旗紅行廬定省得少暇軍諮祭酒紛過從先生
嗜古本儒雅投筆不爲通侯封穴中羣鼠喜觸鬥忽爲
狼狽交相訐王師聲罪致厥討務使荒徼消煙烽先生
躍馬任參佐橐筆磨盾陪元戎昨冬先掃兔一窟短蓬
零捧隨秋風降人感涕竊有獻一劍脫手詞何恭先生
撫之投袂起誓以此劍齒兩兇人心劍氣焮然合怒欲

出室鳴宵中金川之水何澼澼淳沙激石行如龍臨流
坐愛清見底山光樹影交玲瓏昔曾請纓今枕甲以水
淬劍他山攻匱中三尺本如水匹練躍出青芙蓉爛於
初日豔於雪撇波化作干霄虹橫磨十萬此其一指揮
頭白難櫻鋒我今觀畫若觀戰便思手挽百石弓無勇
非孝古有訓竟請摩壘從諸公鷓膏不如逆酋血三鬯
三沐旌爾忠龍身虎氣繼讚頌倚天欲共凌崆峒

長洲彭氏自明季貢生德先買地玉遮與貽令先生行
先俱以遺逸終老子瓏字雲客受梁谿高氏學宰長甯
有循績世稱一菴先生孫南昫侍講定求性愛閒靜早

賦遂初嘗爲高望吟七章仰慕七賢七賢者白沙陽明
東廓念菴梁谿念臺漳浦也芝庭尙書允初進士簪紱
相繼文學代興允初外服儒風內修梵行嘗有句云有
懷皆傍佛無夢不依山要其歸宿不外束身寡過避害
全生學佛學仙原皆無惡於志自盤陀老人以懿文碩
學倡率有位輒喜導引吐納以爲課效溷儒學於神仙
躋文昌爲中祀尺木之卒稱其已登灌頂三教雜糅一
切歸之因果利益始於好善終於好怪流風所煽末俗
爭趨雖以桂文敏大聲疾呼卒不能挽救道咸以來遞
相傳衍東海彼相爲其巨子直至庚子一役乃見燎原

戊戌己亥之交意園表兄爲余言之甚悉敬儀堂經進
之文錄入文經者可覆按也至近世妄人乃欲並三教
而破除之則又以兩齋少宰不便於己之一言如禹鼎
之鑄象矣

宣武門內天主堂卽首善書院有樓爲作樂之所趙耘
松同顧北墅王漱田觀西洋樂器詩云郊園散直歸訪
奇番人宅中有虬髯叟出門敬迓客來從大西洋官授

羲和職

欽天監正劉松齡高慎思等皆西洋人謹案

注璣衡雖防自堯時其制法今昔異同則不可深考後
世儀象若洛下閎若張衡若李淳風若一行皆有所作
而賈逵蔡邕王蕃陸績何承天輩議各不一自元時郭
守敬造爲渾儀後人因之相沿不改若西洋法明中葉

雪橋詩話卷七

罕求恕齋

卽入中國頗有宗其說者而徐光啟李之藻推之尤至
率格於眾議不果行我皇祖洞見西法之精審學焉
而會通之益知其可垂永久迺敕靈臺專行弗失既而
欽定數理精蘊儀象考成諸書寔足爲天下後世法予
雖未習其事然幼聞皇祖闕論因得篤信而敬守之
卽如明以前之法每日以百刻計而西法則以九十六
刻計夫一時八刻其理明簡易曉不待智者而知之聞
本朝初曾有訟西洋人私竊四刻者時刻乃一定之數
竊將安往不亦大可笑乎或年深習漢語無煩舌人譯
云堯時璣衡之法西洋得之

引登天主堂有像繪素壁靚若姑射仙科頭不冠幘云

是彼周孔崇奉自古昔所供耶穌如美少年再游觀星臺爽塏尙

無寫玻璃千重鏡高指遙天碧日中可見斗象緯測晨

夕斯須請奏樂虛室生靜白初從樓下聽繁響出空隙

噲呖無射鐘嘹唳疑賓鐵淵淵鼓悲壯坎坎缶清激鐔

于丁且甯磬折拊復擊瑟希有餘鏗琴澹忽作霹紫玉
鳳唳簫煙竹龍吟笛連桐控楫底頻櫟鉏鋸脊靴耳柄
獨搖笙石炭先炙吸噓竽調簧節簇笳赴拍簾疑老嫗
吹筑豈漸離擲琵琶鐵撥彈箏箏銀甲畫空泉澀篴篥
薄雪飛篳篥孤唱輒羣和將喧轉稍寂萬籟繁會中縷
縷仍貫脈方疑宮懸備定有樂工百豈知登樓觀一老
坐搗擘一音一鉛管藏機捩關隔一管一銅絲引線通
骨骼其下韞風橐呼吸類潮汐絲從橐罇縮風向管孔
迫眾竅乃發響力透腠理若清濁列若眉大小鳴以臆
韻仍判宮商器弗假匏革雖難繼韶濩亦頗諧皦繹白

翎調漫雄朱鷺曲未敵

案簷曝雜記云其法設木架於樓架之上懸鉛管數十下垂不

及樓板寸許樓板兩層板有縫與各管孔相對一人在東南隅鼓鞀以作氣氣在夾板中盡趨於鉛管之縫由縫直達於管管各有一銅絲繫於琴絃虬鬚者撥絃則各絲自抽頓其管中之關振而發響矣鉛管大小不同中各有竅竅以象諸樂之聲故一

奇哉創物智乃出自

人鼓琴而眾管齊鳴百樂無不備

蠻貊緬惟華夏初神聖幾更易鷺鷥肇律呂秬黍度寸尺嶰谷截綠筠泗濱採浮石元聲始審定萬古仰赫獲

迢迢裨海外何由來取則伶倫與后夔姓名且未識音

豈師曠傳譜非制氏得始知天地大到處有開闢人巧

誠太紛世眼休自窄域中多墟拘儒外有物格流連日

將暮蓮漏報酉刻歸將寫其聲畫肚記枕席耘松嘗謂

詩看用事書看用筆畫看用墨此詩全不用事趣味辛
所謂冥心狀物尤爲眞實本領由貴西道請歸養年裁
四十六所撰廿二史劄記等書爲袁蔣所無王蘭泉侍
郎詩清才排拗更峻嶒袁趙當年本並稱試把陔餘叢
考讀隨園那得比蘭陵亦定評也

錢竹汀嘗謂李南澗有三反長身多髯赳赳如千夫長
而胸有萬卷書生長於北海官於南海懋思著書欲以
文學顯而世稱其政事由進士謁選得恩平調潮陽擢
桂林同知刻有貸園叢書手自讐校竹汀贈南澗詩有
養廉半付刻書錢之句其惠定宇九經古義刻成寄示

周書倉二十韻有云直回秦室火終食孔庭膳嘗大暑
至王蘭泉寓舍借鈔惠氏易漢學諸書漫膚多汗沾漬
衣襟不以爲苦於金石搜羅尤富有僕劉福者善椎拓
攜紙墨以從所過學宮寺觀巖洞崖壁必停驂周覽有
所得則盪揚之嘗乘舟出迎總督小憩南海廟命僕拓
碑秉燭竟夜比曉總督舟已過矣去官之日至番禺墓
光孝寺貫休畫羅漢四軸以歸曰此吾宦橐也黃仲則
題其曝書圖云積雨晴窗偶一開手披魚粉出秦灰願
分太古九枝日更曝胸中萬卷來

黃仲則有秋日讀書不疏園贈主人汪實夫及題汪松

溪遺集并所著詩學女爲詩實夫名灼歙西鄉西溪里人其尊人松溪名梧鳳不疏園者松溪之祖景晃讀淵明漸與田園疏之句感而顏其別墅也其經學出婺源江氏又客東原及同里汪氏肇龍於家汪爲尤久爾雅說文三禮三傳皆有論說其成者惟詩學女爲一書授其子灼及程敦敦字厚孫懷唐里人少常游學於武林吳門負才有狂名一日至西溪見松溪大折服遂師松溪仲則詩云坐公讀書秋樹根不疏之園鄰鄭村村人往往罕識面鍵關晤對惟皇墳屏除一切可已事放作百劫難刊文鑄山煮海富研述四始六際逾紛綸上追

申克溯元本下揖亨莨相討論十年書成付庭鯉六經
未有如詩尊瓣香欲祝來已晚私淑尙有伊川孫是真
窺見法眼藏不啻皇甫來韓門肇龍字松麓亦傳江慎
修之學世稱稚川先生

凱音布字龍川以舉人官全椒知縣乾隆三十三年戊
子江甯鄉試同考入闈黃仲則受知於公薦而未售庚
寅再入闈中疾作同事諸君皆危之公曰此輩辛苦吾
以身殉不惜也竟卒仲則過全椒哭龍川先生詩云臥
龍山勢盤嶙峋驅車欲過車摧輪前途叱御且休發腹
痛爲感平生恩甘棠到眼盡遺愛摩挲惻愴傷心魂生

無一面死未哭此慟不比西州門三年枉自設虛位那
盡生存感恩誼此日青山疊疊愁當年紅燭條條淚孤
負看花住馬心不才自分甘拋棄苦爲方干抵死爭誰
知爭命原無計此曹心力鎮相憐反自拋殘辛苦地兩
度戰場餐血腥先生手持千佛經飄然上赴玉樓去爲
道此間多不平遂令感誦溢吾黨豈獨賤子緣私情暴
腮點額無所憤從此江東亦將隱斥鷃何來負翼風躋
糟只附傷心本丹旄多時返故鄉楚雲燕月兩茫茫可
知德政崇碑下尙有門生弔夕陽其序云景仁頻年奔
走終未得一展拜盡弟子之禮隱隱之中上負知己今

過所治不覺愴然爲此詩也

覺羅成桂雪田乾隆丙子舉人有讀易山房詩佳句如
林聲早得秋及秋在夕陽閒其風尙冷峭可想見也與
傅凱亭朱青雷史甯約樂滙川相友善敝裘破帽時集
於慈因寺青塔院大慧寺拈花寺安化寺極樂寺看竹
賞霜葉狀甚艱苦而天機清妙善談論一座每爲之傾
倒老年貧病益甚仰生活於臞仙將軍遺蹟不多見嘗
自書其詩爲一卷以貽臞仙亂頭粗服具有逸趣爲蓮
峰居士所得珍祕備至法梧門謂所閱臞仙詩稿經雪
田評者推許未免過當新城之於商邱前輩已有行之

者矣仲子月齡字虛舟亦能詩贈松坪上人句云雲霞
變花氣鐘磬下溪聲

秀水盛柚堂題柚詩序先府君令龍川時官舍東西齋
各有柚一樹東樹瓢微紅西樹瓢白而微碧味更勝爲
邑中冠予攜核以歸種之堂北十七年不花丁丑春予
入長安其歲始花垂實六且大味亦不減於粵十月歸
里見餘果一一投瓜田徵君張丈張丈繪圖題詩并爲
說以贈又以其一竝徵君說呈於司寇香樹先生先生
亦題詩又別爲書竝書詩與說彙成卷屬百二題詩於
左作吾鄉嘉話俾後之志物產者有取焉柚堂字秦川

爲桑歿甫高弟丙子舉人官淄川知縣著尙書釋天六
卷王德甫贈詩所云袖中一卷書談經恣疑難中星步
羲和相宅溯姬旦指此將之揚州夜過平望作云江豚
吹浪夢還驚來去三湘萬里程卻喜櫻桃湖外月今宵
猶作故鄉明楊誠齋平望詩櫻桃湖裏月如霜卽鶯脰
湖也

保山袁氏爲永昌舊族陶村學正文典與弟蘇亭

文作
揆

山

文

咸能讀書諳悉滇中舊事輯滇南詩文略付梓行

世其滇南詩略序謂滇在赤虺炎河外漢以後聲教或
阻張叔盛覽尹珍許淑張志誠諸人著作不少概見故

渡瀾滄白狼等歌卽韻語之始驟信趙叔達楊奇鯤淵
海各什亦聲律之先迄於有明盡變蒙段舊習學士大
夫多嫺吟詠顧劫火之餘聞見異詞如郭舟虛祇存游
覽數什張南園僅載春園疊韻一編升菴所稱七子文
獻亦惟禺山宏山中溪猶有鈐板其他率皆斷簡殘編
等於吉光片羽與弟文揆纂輯編次共得十卷法時帆
與師荔扉刊南園詩存時亦嘗採取其書南園有題袁
十三蘇亭春雪歸岫圖詩荔扉字端人有滇繫百卷其
江湖共秋水城郭半斜陽之句南園亟賞之

博西齋有和王蘭泉趙璞函兼寄錢冲齋詩與冲齋同

官雲南時作也沖齋尊人爛以孝廉授經於阿文成公
病歿京師孤貧無以爲家宗老文端公勸之學乾隆丁
丑由召試授中書庚辰成進士蔣文恪公俾典書記居
宣武外距黎光橋文恪公第十餘里徒步往來以曹郎
歷官陝西興漢道雲南迤東道少從其姊夫沈泰初於
廣東學幕復從甘肅謝太守某於安徽轉至肅州踰二
十年奔走四方習於勞勩其居官也爬梳繁劇廉介不
肯絲毫苟每五更輒蹋壁誦幼時所習古文詩賦盡一
篇乃已有燕貽堂詩稿憶三塘云蠣殼窗明射綠波螭
頭小舫滿官河幾年載酒三塘路醉聽吳孃鴨子歌頗

饒風趣

桐鄉馮養吾侍御注玉溪生詩其子星實鴻臚復爲蘇詩合注正王施查三家之誤而補其漏略最爲精審嘗繪夢蘇草堂圖錢曉徵與鴻臚書云施氏元本春帖子在端午帖子之後查本始易其次以僕考之兩帖子皆元祐三年所進是年閏在十二月諺所云一年兩頭春者也其正月己酉朔據子由元日宿齋詩今歲初辛日正三明朝風氣漸東南還家強作銀旛會雪底蒿芹欲滿籃是正月三日辛亥祈穀四日壬子立春也公於時已差禮部知貢舉例當鎖院故不及供帖子其閏十二

月十五日丁巳爲己巳歲之立春節公次韻劉貢父春日賜旛勝詩有臘雪強飛纒到地之句此立春在臘月之證也任注元祐三年戊辰作正謂此詩作於戊辰臘月非謂戊辰之春也施氏編此詩於戊辰歲本無差誤查氏強作解事移此詩於己巳卷首并將春帖子移於端午之前則眞誤矣劉貢父集中題云呈子瞻冲元内翰子開器之舍人執事據許將傳知成都府元祐三年再爲翰林學士謂將於三年方旋京未必立春時卽在朝疑任注有誤僕攷東坡内制集有元祐三年四月十九日宣詔許内翰入院口宣是則正月立春許固未在

朝列若閏十二月立春正與東坡同直任注本無誤也
年譜先生生於景祐丙子十二月十九日不見干支執
事亦疑而未決僕以遼志朔攷證之是年十二月實乙
巳朔則公生日當爲癸亥施元之以爲壬戌者殊未足
信後來王見大編注集成考證視馮氏更加詳博惟詞
繁不殺其評詩故與河間紀氏相攻詰亦殊可不必耳
七古三句一換韻三疊而止謂之促句換韻法禁巒格
也後人每于三疊之外多用韻張策時題徐昭法畫馬
云南州高士如冥鴻偶然畫馬非畫工矯矯卻得雙眞
龍流雲飛雪花浮動疾馳下阪長風送紫髯官不敢

控春塘水暖芳草齊方瞳紫燄臨青溪跳珠散迸碧玉
蹏前馬吸流微濺沫後馬涉波氣咆勃弄影驕嘶縱超
忽嗚呼神駿愛者誰在廐萬駟非權奇空被錦韉牽珠
璣蘭筋蕙腕時遭咤千金不得增高價縱有健步誰當
駕落日蕭條鳴向天蹟雖在野神則全逸氣不受俗土
鞭我欲穿雲踏龍脊安得借汝追風力山南更訪高士
宅策時賦才英雋與趙璞函凌祖錫汪韓懷吳企晉在
申江書院同學齊名以舉人獻賦入中祕其疏雨一旗
山店酒春風雙轡馬滕花亦是元人佳句

鄭楓人官杭州日尋姜白石墓不得惆悵爲詩嘗取舊

本杜集刊爲袖珍版箋注概從刪削以少陵一生不爲
鉤章棘句箋釋注解言人人殊無取也此與趙文敏書
道德經謂注釋愈多而愈失悉與去之重爲繕寫同一
用意吳子律稱其襟度瀟灑鵲爐鷗舫判牒湖山彷彿
紅豆詞人之在吳興杭州府志以鄭志爲佳有玉句草
堂詩集和同年施鐵如侍御過訪夜話並送別之作云
楚客垂垂老燕臺草草過秋聲連日夜鄉夢落關河暖
眼逢人少離憂自古多非君今夕話誰與慰蹉跎遺詞
三卷爲其壻戴竹友所刻清平樂云雨闌風定葉落黃
昏近燈下候蛩涼入聽又是一年秋信夢回留得茶甘

晚花香綴筠籃只少畫屏新月夜情都似江南楓人以
召試賜中書新婚北上留別閨中云年來春到江南岸
楊柳青青莫上樓時呼爲春柳舍人此詞蓋到京以後
所作

武進錢稼軒司寇書法東坡畫出入於元黃子久王叔
明季木大令其介弟也官鄞縣令屢欲乞歸而未果錢
橫山寄以詩云檢取邱遲書句報雜花生樹亂鶯飛季
木得詩幡然謝病築室邢溪之北曰半園之半書畫亞
于文敏詩格近大歷十子有竹初未定稿雨夜與夢鈿
坐話云幾日西窗雨天涯尙許同關河雙淚外骨肉一

燈中短髮難銷酒哀音易墮鴻明年見春草好與數飄蓬
蓬晚年所作稍雜道流禪悅之語張皋文答竹初書與
論神仙之術呼吸吐納無益壽命之數其說甚詳

石輔棠學士嵩貴有郵囊存略湯緯堂愛其西陂句云
後夜伊人夢迢迢綠雲裏謂類左司他如暑氣薄於曉
及河流樹裏明寫早發之景如在目前伊爾根覺羅贊
侯侍郎福增格酌雅齋詩與之相若如廢寺夕陽多及
倦翼戀空林與象亦復沖遠

李湛亭子奉翰孫亨特三世總河馮文肅寄湛亭文索
墨竹云寫竹有成竹坡翁得懸解亦有荆蠻民逸氣自

揮灑寫竹必求酷似竹著眼驪黃鮮驥足解衣盤礴與
天游胸中別有干竿綠惟君寫竹與竹忘颯然筆下生
篔簹一枝一葉具真氣尺幅勢敵千畝強我非畫師識
畫理知君不負管城子茅齋要借一林秋跣足科頭望
煙雨湛亭字濟夫一字用茲初以州同知薦歷江南河
庫道疏濬淮揚徐海鳳潁泗各郡縣支榦河道一百數
十餘處動帑二百四十餘萬有奇乾隆二十九年授河
東河道總督以江南耿家塞險要察勘對岸引渠切灘
順勢帑節工平赴陝州三門查探黃河來歷諮度久安
之計以汶上老人白英立祠戴村子孫蔭龔頂帶自人

本朝未奉明旨奏請仍給八品世職二十六年卒于南河總督任賦性活澹不適聲色公餘焚香宴坐手書不去或賦詩以自娛奉翰輯其遺稿爲戢思堂詩鈔其題畫梅云經年消息斷羅浮抗手癯仙此日游一筆生枝增悵惘嫩寒春曉是衡州與文肅多倡和之什文肅初亦以同知于役南河共事最久也時有李純九名永標亦隸漢軍累官安徽廬鳳道著有寄素堂詩草二卷雜著二卷文肅寄純九詩寄書慰離緒翻令離緒增自憐伏櫪馬更作打包僧龍腹慙空附雞聲憶共興思君不可見含意向寒燈

鐵冶亭雪夜讀牧亭詩云牧亭遺稿半凋殘一穉昏燈
抱影看讀到孟郊清絕處雪花如手打窗寒玉閨峰題
家牧子詩集後云聞說牧牛子奇窮乏往來鶉衣風落
絮茅屋壁生苔宇宙詩腸隘煙霞醉眼開胡琴何處碎
白首老金臺午夜披殘稿高吟得未曾思深蟲語砌室
暗鬼吹燈刻鏤心如髮摩挲句有稜何人鑄賣島學步
愧難勝牧亭名兆勳字佑依一號牧牛子有牧亭詩錄
一卷贊侯侍郎爲之編次乾隆戊寅序而刻之其不堪
持贈吟一卷則晚年續刻也其自跋云半窗冰雪殘臘
將歸老境寂寥偶作一二短章不過湖邊茅屋下消遣

不淨妄心學殖荒陋不敢謬擬韓子而夢中撫掌者那
得有孟郊其人耶果如釋氏有再生之說定補償今生
不讀書公案秋夜聽雨云涼宵山館寂野客衣冠古背
影坐秋燈垂頭聽夜雨春夜客中卽事云客館鄰蕭寺
春燈紅冉冉模糊睡起僧打鐘不記點山溪種藕云岸
柳環溪渚童子採拳蕨春風二月忙藕花種明月鄭村
云明月照花陰歸禽棲野樹暝色暗空村犬吠煙生處
山中春興云開窗快舉樽青山乃吾侶寂寞鄰家春杏
花寒不語送春日別友云吟懷離緒酒難消花落松關
倍寂寥明日送春兼送別雨中煙柳溼長條鶴亭參領

稱其詩境如雨花春晚蘿月秋深可謂工於評泊鶴亭
名白衣保其詩如怪鳥避人飛山僧抱雲宿林空同鶴
住果落與猿分煙波遠浦孤颿落蓑笠平原一犢歸意
象寒瘦與牧亭亦復笙磬同音

甘道淵運源爲劉海峰弟子自號十三山外史晚年考
職得廣東英德縣象岡司巡檢以名士作下吏執手版
拜上官憤憤以老鐵冶亭懷道淵詩白髮詩人老黃雲
客路長孤身投五嶺歸雁絕三湘託命波濤裏全生瘴
癘鄉壯懷眞不淺七十到蠻荒年七十七卒于官素工
畫楚楚有致玉閨峰壽道淵七十詩有愛畫眞成癖之

句朱子穎有題道淵梅花冊子詩篆隸八分俱有古法
尤善刻小印純乎漢篆不屑作文三橋伎倆得者寶之
與弟子灝運瀚齊名時稱二甘子穎詩棠棣祇今餘涕
淚松楸那更接泉臺聞道淵子灝俱下世作也詩學宋
人時李眉山陳石閭二先生方領袖詞壇見道淵詩許
爲健將朝夕觀摩學益進有嘯崖詩集其薊門懷古云
帝城秋色遠東眺薊門開日出扶桑近雲連孤竹來驚
沙飛蒼莽疊嶂插崔嵬碣石今懸戍黃金舊築臺燕昭
勤遠略樂毅逞雄才千里風雲掃三齊草木衰後王迷
駕馭良將困駑駘已入先生蠹終然旣死灰一城能報

復一木乃摧殞易水悲風起西山急景催乾坤留勝蹟
俯仰足深杯顧我游方倦登高興未摧終年守環堵此
日望蓬萊儻假王良御空羣起逸材一氣旋轉其神骨
氣格足以壓倒一切性疏慢久不得志於有司侈然自
放隱於詩酒與人無可否援之而止口吃喜議論每一
啟口座客閔然嘗冬夜與治亭論史事治亭謂古人作
事有幸有不幸張子房博浪一擊似匹夫市井所爲使
不能助漢成帝業又隨赤松子游以避禍亦不過於俠
客列傳內增一荆軻聶政耳又何能功名烜赫如此其
盛也道淵舉狄梁公受武后封屈身牝朝雖一語挽九

廟之失其功甚偉儻其時五王之兵不競敬業之檄空
傳梁公能以隻手復唐祚乎兩論默合相視狂笑道淵
愈吃愈笑愈笑愈吃汗淚俱下戟髯怒飛座客俱爲傾
倒其性情風致類如此子灑有舞蔗軒稿其冬夜夢醒
作云孤燈上殘燄涼月下空林重以平生志淒其此際
心近人半規涼月通宵色一枕勞生向曉心之句從此
奪胎至昔人詩酒無通夜力事滿五更心則幽憤語矣
王子雍亂漢儒家法撰聖證論以難康成又偽造家語
飾其說以欺世仁和孫頤谷作疏證六卷證明肅之竄
改謬妄家語之非古本丙戌通籍觀政西曹丙申以侍

御陳情家居奉親杜門著述凡生平心得手自錄記爲
讀書脞錄七卷其紅丁一條云貫休詩蘇包玉粉生香
壘菌簇紅丁出靜槎蓋詩家象形借用之語陸放翁滿
貯醕醪漬黃甲密開小甕貯紅丁想卽祖此然不出菌
字則不知紅丁爲何物矣宋人詩大抵源流於唐而不
及唐律之細如此類可見是條雖不過流覽所及無關
閱指然其讀書之精覈可知矣嘗撰孔叢子疏證匡謬
辨妄咸有根的其所輯風俗通佚文刊入抱經堂羣書
拾補文選理學權輿刻入顧氏讀畫齋叢書嗣子同元
字與人能讀父書曾注弟子職汪選樓爲之序

太倉彭禮字行之號蘭堦乾隆三十一年進士選授甯武知縣朱竹君贈以詩云子學甚醇正子貌頗古雅去作親民官神真跡乃假又云淺深難獲上甘苦易及下省肥縣則瘦不角故易捨語極真摯竹君蓋其鄉舉同歲也在官十一年以廉明稱後改潁州教授著有北窗吟稿金臺倡和諸集次子兆蓀字湘涵又字甘亭少卽神雋有聲陳玉臺侍御贈行之詩有云喜聽清聲在雲路丹山雛鳳啄桐花所著小謨觴館集外有南北史文鈔懺摩錄潘瀾筆記嘗爲胡果泉校刊文選爲曾賓谷審定駢體正宗嘉慶丁卯所知者主江南試必欲得甘

亭甘亭聞之遂不復應集中所爲貽友人書者也

華亭布衣翁春字曙鳩一字辨堂亦字澹生別自號石瓠少與母沈居北郭外菜花涇挑菜自食姚平山周之使卒學已而沈學子致之門下遂能詩于詩好元人不好李杜作字好孫過庭蕭條孤寄不與世俗相關青浦胡家珊嘗以門右傍街一小樓居石瓠母子二十年不常見其竈突有煙而母猶勸石瓠讀書勿悔性篤孝善事其母母年八十餘考終劉文清督學行縣聞其名欲見之不可乃手書爲卷以贈王蘭泉庚子假歸禮先于石瓠序其詩比之於林逋魏野王暢甫爲華亭校官三

往拜僅一見弗報謁年踰四十不娶教授生徒以自給
不就有司試常拜平山學子墓下以嘉慶二年十二月
中寒疾驟卒年六十二有賞雨茆屋詩鈔四卷游龍門
寺云信屐破白雲得徑遠塵闌欣踐物外蹤老鐵遺躡
在微風灑高杉滿院落春黛廉夫手植杉尙存小憩佛香中僧
雛淡相對疏磬時一聲幽花弄餘態空空雖未談心心
亦無礙逍遙溯來途欲蹴池光碎叢篠搖夕陽明滅歸
禽背清幽疏勁世所稱布衣能詩者李客山方蘭坻不
是過也同縣與石瓠交善者吳陶宰名鈞自號曰玉田
生華萃山人懋謙曾孫生平不應舉不知家人生產所

好讀書旁通天文句股金石篆隸刻印之術時時爲人
教小蒙童以食所居梅花書屋在城東委巷中坳垣蹋
井處之浩然于詩不苟作酒酣嘆喑輒以誚其坐人以
窮死縣人哀校其所爲獨樹園詩鼠璞詞各一卷刊行
于世其垂柳不妨聯客座看山何礙缺鄰牆之句亦復
可傳

縣州李雨村與弟墨莊鳧塘稱三李以五代詩向皆附
之唐末宋初之間輯全五代詩一百卷序稱五代十三
君共五十二年兼以十國各據疆土易姓僭竊如翻鏃
上餅以致官爵益濫小人乘君子之器富貴出于非意

視國家安危如秦越不相謀故其時將相大臣有一人而事一二朝者有一人而事四五朝者如後唐之馮道所向稱臣後梁之王易簡幾徧五代後漢之王仁裕歷事八君惟於其人核其生平將受知必有最深之地功名必有最顯之時本其人其事以定其爲何代之人亦愧其不安之意也雨村撰著甚夥以此書爲最足傳

邵與桐學士落葉詩云斷腸橋畔此重經又見風林捲落星斷梗隨風人易別薄寒吹袂酒初醒餘霞江路兼山路暮雨長亭更短亭憶昔攀條勞望眼征衫可似舊時青與桐少多疾左目微眚讀書十行並下終身不忘

乾隆乙酉錢竹汀典浙江試所取士嘗稱爲東原替人
乾隆三十八年詔修四庫全書由歸班進士改庶常充
纂修官得姚江甬上史學之傳於宋明以來史事最深
乙部諸書提要多出其手永樂大典有薛居正五代史
乃會粹編次其闕者以冊府元龜諸書補之由是薛書
復傳朱介裴戊戌送邵二雲太史入都詩云先生經義
析紛紜讐討遺文補綴勤郭璞後身有揚子趙岐今日
折朱雲寫來影子有王傅柯氏新編體未宏東馬南狐
誰有筆千秋述作待君成嘗謂爾雅乃六義之津梁而
邢疏蕪淺遂別爲正義自謂此書苦心不難博證而難

於別擇之中能割所愛耳乃外人竟有病其略者斯事所以難言竹汀論宋史紀傳南渡後不如東都之有法甯宗以後又不如前三朝之粗備微特事迹不詳卽褒貶亦失其實與桐因取熊克李燾李心傳陳均劉自舉之書及宋人筆記撰南都事略以續王偁之書未成而卒其修餘姚志於列女門僅書某妻某氏守節若干年最簡括可法又撰有孟子述義穀梁正義韓詩內傳攷皇朝大臣謚迹錄方輿金石編日輯軒日記南江詩文鈔所居地名秋風浦據漢書地理志許君說文以禹貢三江其南江從餘姚入海因以南江自號

法梧門贈姚筠圃句云一官贏得十車書筠圃名玉棟
字子隆乾隆庚寅舉人官山東臨邑知縣聰強耆學自
少小以至宦游舟車風雨無一日暫廢嘗過廠市酬一
書如其常值弗與因倍之再倍之仍弗與拂衣登車去
夜不獲寐破曉卒遣騎奴以三價值馳取書歸其篤好
如此所藏邊仲子詩冊卽漁洋所訂之睡足軒詩也前
有徐東癡手記併漁洋跋東癡墨書漁洋朱書翁覃溪
題詩於原冊後復摹二本以一贈梧門梧門題詩有二
梧桐院落疏疏雨石墨香分讀易樓讀易樓筠圃貯書
處也王惕甫爲作讀易樓記稱其於書無所不讀其插

架不著標題造次抽檢未嘗輒誤非專治一經治一藝者也所著詩古文八卷其重陽前五日賦云漫游每憶當秋好靜坐翻憐得日多

亮拔之才植其高骨雄勁之氣鬱爲正音岱色夜明下臨星斗河聲秋壯中挾風雷先生以名節砥柱中朝而詩亦卓然可傳如此蓋能孤行其意不爲流俗所移故有直造古人處寡識之士卽文字亦多依附卒與草木同腐豈不哀哉嘉慶十年六月十三日吳嵩梁記是日雨坐詩龕爲法梧門學士參定朋舊及見錄選存者凡五十首益南園無專集行世師君所刊亦其殘稿故所

采尤多此蘭雪生題錢通副遺詩語也往體如還家三
首云代馬不忘北越禽欣南棲游子乍還鄉悅悅意翻
迷入門見父母惜我顏黑鰲長跪進致辭行李實慘悽
爲言不足憂吾腸便藿藜諸弟出營食顧見蓬頭妻弟
婦拜且卻小妹嬌且啼阿長裴氏子父母死傭吾家將米歸黑鹽
手並齋喜傳豆角熟不但食黃齋堂堂七尺軀壯齒生
久齊飢寒上累親不如跪乳瓶春雲亂漠漠春草碧萋
萋我始至前村竹根鳴午雞是維二月初萬生成已齊
人情同念舊別久見未迷走視太史公簪筆入金閨豈
聞去年水飄蕩家無棲辛苦留性命還歸理故畦雖無

完廬室幸芘舊鉏犁聞此痛五中熱淚千行啼骨肉幾
不全功名何足稽死當狐首邱生當龜曳泥黃昏忽細
雨孤燈照淒迷扣門欣弟歸赤腳踏水泥始知仲已遠
或到武昌西叔壯頗復銳季長與我齊狂喜出賒酒夜
久滿瓶攜噴我問生事杯進不容稽人生固有窮但恐
制行低齊人饗富貴羞死妾與妻近體如自隨州至江
陵八首之二云江流漫無數屢渡不知名馬倦登船怯
鷗閒避櫂輕枯楊風意苦廢寺水痕明此宿知誰託飄
蕭暮笛聲江陵城上望江外是公安萬古滔天水孤城
一彈丸風連巫峽動煙入洞庭寬去住嗟今昔斜陽更

倚闌自題柳溪書屋畫云合沓清流萬柳深溪堂面面
有清陰曉簾纔卷燕交入午睡欲終蟬一吟不掃落花
常滿地偶添新竹漸成林酒船百棹浮明月溪水還同
不住心劉希韓諸人同步觀耕飲陳分山書堂云故國
遙瞻十丈臺故人勤績九年杯拆皆成字蒸新麥望卽
生津飭小梅訪舊絕欣爲鬼少題詩眾覺有神來燭殘
更愛流天月照故將軍犯夜回游太華寺云樹交危磴
盤青靄天縱飛樓納白波暮歸云平湖水定喧魚扈黑
月林荒上鬼燈送輔臣宗兄赴平魯兼寄望峰云雲勢
九邊臨塞慘雪痕三月盲沙虛寄望峰云魚市樓臺空

憶酒雁門風雪早知寒再寄萬荔村云共識衛青收幕
早終憑梁道給軍能鳳翎兩足山回氣鹿角灘平日蕩
陰早起云雲動一行回白雁天垂七宿轉蒼龍留宿李
氏園小飲云門接山光來異縣牆分花氣與芳鄰偶題
云壁鼠時窺空甕下沙鷗故近短牆來類皆憂憂獨造
非絺章繪句者所能

程魚門辛卯捷禮部試爲朱笥河分校所得士總裁劉
文正公歎賞其試帖自書一紙徧示同列家素饒治鹽
筴于淮獨尙儒術少時讀鼓山劉念臺人譜見其論守
身事親大節輒心慕之故以鼓園自號嘗與友人書謂

宋儒講太極河洛牽入麻衣希夷之說又以鄭衛爲淫
詩其它小誤處亦有之大者止如是至於天道人紀節
心制行務爲有用之學百世師之可也古人一飲一食
必祭先嗇先農示不忘本吾儕被服儒素亦思其源安
在而敢自異乎藏有懷仁集右軍書宋搨本蘇文忠東
井硯明宣德龍香御墨及羅小華諸家墨以三長物名
齋廣額方頤髯修三尺白如銀絲官吏部時程文恭爲
尙書山左袁公爲侍郎並風裁清整長髯亦雅相埒京
師謂之吏部三髯修四庫書改翰林甲辰引疾以訪畢
秋帆卒于關中秋帆經紀其喪厝于江甯姚夢穀過漁

門墓下作云憶挈柔豪就石渠春風花藥襲襟裾隨珠
荆玉多奇士金匱名山見異書霄漢幾人成令僕滄洲
吾道在樵漁獨君埋骨青山隧長鬣松呼似識余

姚夢穀哭孔撝約三十二韻云孔夢興疇昔斯文失在
茲世從乖大義家尙誦聞詩舊德誠遙矣通家願附之
壁中書若授坐上客何辭往歲南宮直東征使節持鹿
鳴君始賦駿骨竊先知庾信升朝歲揚雄好賦時翰林
眞不忝家法亦無虧文富韓陵石書摹鄒嶧碑談經工
折角好學復深思海宇承無事宮庭大有爲九流讐祕
省三俊接彤墀博誦先王語當求孔氏師二劉今幾見

後鄭獨勤儀老氏藏書室儒林習禮帷廟堂君竟返延
閣士奚資道德慙塗說文章劣管窺燕居頻接鄰狂論
每無疑處處同栝酒殷殷愛履綦逮聞辭禁闥先已病
茅茨岱嶽分天峻江流控地卑龜陰人去少舒口雁來
遲鵬鳥天斜日龍蛇在歲支風流前日會天意百年期
橘幼靈均頌蘭摧長史悲豈教爲異物眞見瘞瓊枝銘
鼎幾先德沾袍辨異辭君書來云近喜公羊學方爲之說未竟書成甯餅
肆身泯罷醴斯適就潛夫論希聞智者規九原終不達
一卷更投誰余以經說寄君甫去計不及見髟鬢秋增白雙髭昔對垂
止餘名篆在啟篋涕交頤攜約生自聖裔師事東原乾

隆戊子夢穀典試山東時年十七出其門下辛卯成進士官檢討丁內艱陳情歸養築儀鄭堂讀書其間夢穀嘗爲之記旋遭家難以父繼汾所著書爲族人所訟將西戍塞外扶病走江淮河洛間稱貸四方納贖緩父因之獲宥未幾居大母與父喪竟以毀卒時乾隆丙午年三十有五其儀鄭堂駢儷文汪容甫讀之以爲絕手博學多通著春秋公羊傳通義十一卷大戴禮記補注十四卷詩聲類十三卷禮記卮言六卷經學卮言六卷少廣正員術內外篇六卷

乾隆三十七年開四庫館全書告竣都萬七百七十一

部十七萬一千四百十卷於文華殿建文淵閣圓明園
建文源閣熱河建文津閣盛京建文溯閣各分庋全書
三萬六千冊復發帑金再建三閣文匯在揚州東園大
觀堂文宗在鎮江金山寺文瀾在杭州聖因寺行宮旁
俾江浙士子得以就近觀摩傳錄汪容甫以拔貢典三
閣事五十九年因校勘文宗閣書往浙江借書讐對卒
於西湖葛嶺園僧舍盧抱經孫頤谷張芑塘梁曜北爲
文以祭有云名園高枕山茶雙植竹閣柏堂風流允嗣
園爲山舟學士祠宇于我乎殯正位中楹孫淵如謁盧
學士墓及訪容甫葛嶺園捐館處詩云我到西湖痛師

友一尋宿草一招魂葛嶺及金山精法樓皆有容甫象
祀焉江鄭堂謂容甫一生坎坷不遇至晚年齷使全德
耳其名延之鑒別書畫爲謀生計藉此稍能自給全德
號惕莊戴佳氏容甫曾祖快士先生名鏞京號西谷善
刻印有紅朮軒山水篆冊晚年有紅朮軒印範其紫泥
法王丹麓檀几叢書刻之

霞川刺史琨玉以乾隆乙酉拔貢生官滁州有拄笏軒
存草朱笥河燕歌行云二十作令隸潁州仁虎斂氣足
食牛二十九日醉有由重牘山積吹毛輶爲霞川題畫
卷作也又有題其潛山種花圖之作霞川詩如桃李種

芳春松柏貞永年連城不掩瑜令德終能宣頗似漢魏
人語

無錫諸生施晉錫蕃別字雪帆在京師日主黃仲則家
笥河贈句云鄭虔傭字庭紛葉匡鼎談詩壁共鐙思歸
未得屬懷甯余少雲作雪帆圖以遺意笥河題云荒涼
地記踈龜蛤冷落心空附驥蠅

吳縣張商言舍人爲明烏程張莊僖公永明六世孫公
舊有四雨莊商言情王蓬心爲作四雨莊圖朱笥河題
云張公菱波塘上住作朝直臣憶鄉樹令弟爲開四雨
莊曰歸一年感逝賦二百餘載愛樹成樹成又毀莊餘

名曩孫舍人懷祖德乞圖王宸手筆精湖趺山頭接銅
硯澹澹皴痕遠遠見方牀一帶帶平橋繞屋扶疏樹搖
硯密杉稀柳中有人羣屐絲竹纔歸身斯須林下如天
福人海波擣那可論鈴山草堂彼一時聽雨青詞更製
詞紛紛楊沈卵碎石効嵩父子公疏持發驕王辜肅朝
禮要張四維一任己志行警爾思尊鱸羨公待得權臣
死昔賢一水復一邱非爲童子戀釣游退能閒居進報
國思人愛屋從無由古木荒荒水拍拍六葉郎君好詩
客若爲嘉靖詠太冲不堪款段都門陌我過高軒名記
珠看花幾度酒幾壺人生草草數相見其負君家如此

圖聽雨樓在京師繩匠胡同爲分宜別墅周立厓居之
卽取以名其詩草殊不可解

翁正三鈐山堂詩堂倚袁江麓勢偏青峰俯愧碧潺湲
大雞韓孟聯吟好小吏廬江樂府傳莫認故巢思翡翠
試憑後學灑山川世間豈少藏修者岑寂書窗二十年
其論王文簡論詩絕句謂如嚴嵩者縱使其能詩若使
通加選輯明詩諸家而及之或可不以人廢今上下古
今乃有論嚴嵩一首耶憚簡堂書鈐山堂集則謂其詩
文庠陋序凡十餘皆忸怩之言而湛若水爲最以唐順
之之才識亦無殊異焉閻立本以畫水禽爲恥韋誕題

凌雲臺榜至自悔絕筆法以今視之孰若此辱之甚哉
此論尤足爲文人輕易下筆者戒越縵先生謂介谿五
古五律頗有清雅之作則平允之論也

李子喬贈顏運生句詩人慣作周旋事定買鱸魚祭板
橋運生名崇桀修來考功曾孫

新繁費氏仲若此度滋衡三世工詩滋衡子軒字執御
能以詩世其家春閨云荳蔻風微二月時曲欄亭畔雨
絲絲梨花半樹將成雪下著珠簾總不知紅橋柳色云
畫舫春歸酒易銷絲絲牽恨說前朝剪刀風裏初開葉
魂斷揚州第幾橋風流蘊藉不減樊川蜀人詩如岳威

信中秋云百歲人生將過半一年秋色恰當中張鶴林
生日憶家云三十吾生一彈指五千客路九迴腸皆在
船山未出以前

袁陟題劉仁瞻畫像詩陣前仙婢生無媿鼓下蠻奴死
合羞若溪漁隱以爲婢實呼瑣不應讀仄聲錢詹事謂
南史仙婢本名仙婢以名不雅改之袁讀婢如婢音仙
婢蠻奴對偶極爲精切而元任譏之是以不狂爲狂也
譚仲儀論詩盛推臨江鄉人鄉人鄉人仁和吳西林穎芳其
稱名于釋氏曰樹虛所著有吹幽錄說文理董文字源
流金石文釋金屑錄藏畫記其詩集自序云古人讀書

不專務詞章偶爾流露謳吟僅抒所蓄之一二其胸中
所蘊淵乎其莫測也遞降而下傾寫漸多逮至元明以
十分之學作十分之詩無餘蘊矣次焉者或溢其量以
出故其經營之處時露不足如舉重器雖同一運用而
勞佚之態各殊古人勝於近人可準是以觀也爲人靜
默自喜嘗一赴童子試爲隸所訶自是割斷舉業專用
力於讀書兼通釋典研唯識論尤精晚年家事日落館
于振綺堂汪氏壽松堂孫氏半舫堂項氏者十餘年嘗
譜伐檀詩入琴曲乾隆四十六年卒年八十厲太鴻西
林過滿月精舍詩云學多先識字年長欲依僧其謂今

本說文取一字爲篆書而細書其說爲注其實許氏原文上下相連皆當作大書如鸕黃爲倉庚之名後人不知乃誤讀爲黃倉庚後來段王諸家固當推爲先導王德甫謂其文尙平易然如飛來峰賦紙帳賦未嘗不體物瀏亮自成馨逸翟晴江教授亦居臨江鄉之甘棠邨著有四書考異爾雅補郭通俗編嘗與西林同撰草塘辨利院志與鄭筠谷杭大宗金江聲及太鴻結南屏詩社與仁和朱點古心分輯湖山便覽其哀舊詩云經年苦著膚永夕淚洗面毀瘠禮未任至性不可勸紀朱劭亭大令心學毀卒事也

洪素人書楹云慎言當效姚晋抱戒酒不如陳伯思見
孔誦孟味易栢詩書後

雪橋詩話卷七

雪橋

卷七

奕求恕齋